

御撰資治通鑑綱目三編

明

卷六
之十

DS
753
Y83
v.2

University of Toronto
Library

C 388/62

ASIAN COLLECTION

午丙

御撰資治通鑑綱目三編卷六

起丙午明宣宗宣德元年凡十八年
盡癸亥明英宗正統八年

宣宗章皇帝宣德元年春三月以張瑄爲華蓋殿大學士

○夏五月詔毀身療親疾者不得旌表

總旗衛整女刲肝愈母病禮部請旌帝曰孝親有道剖腹刲肝豈可爲孝若因此傷生其罪益大所請不允

秋七月京師地震○始立內書堂

改主事劉翀爲修撰專授小內使書其後大學士陳山修撰朱祚俱專是職選內使年十歲上下者二三百人讀書其中後增至四五百人翰林官四人教習以爲常內官始通文墨掌章奏照閣票批硃與外廷交結往來矣

京師地生毛長尺餘○八月漢王高煦反帝親征

高煦徙國樂安益怨望日夜造軍器籍丁壯爲兵破獄出死囚厚養逋逃及無賴子弟奪官民畜馬立五軍指

揮授王斌朱恒太師尚書等官約山東都指揮斬榮爲助期先取濟南然後犯闕樂安家居御史李膺詣京告變高煦旋遣親信入京約英國公張輔爲內應輔立繫以聞帝遣中官侯泰賫書賜高煦高煦引泰觀其軍馬兵器曰以此橫行天下可也爾歸報爾主速執送奸臣然後議吾所欲耳泰歸不敢言越數日高煦又遣使賫奏至多所指斥索誅奸臣以夏原吉爲罪首帝夜召諸大臣入議楊榮首勸帝親征帝難之榮曰彼謂陛下新立必不自行故敢爾以天威臨之事無不濟臣請先驅原吉力贊之帝意決遂發京師命鄭王瞻埈襄王瞻埜守居

帝至樂安高煦降遂班師

高煦初聞薛祿將喜曰易與耳及聞帝親征始懼其黨有自援來歸者帝厚賞之令還諭其衆復遣高煦書曰張敖失國始於貫高淮南受誅成於伍被今六師壓境王卽出倡謀者朕與王除過恩禮如初不然一戰成禽或縛王來獻朕雖欲保全不可得矣前鋒至樂安高煦約詰朝出戰帝聞令大軍蓐食兼行駐蹕樂安城北諸將壁其四門發神機銃擊之帝復以敕射城中諭禍福高煦請降願假今夕訣妻子帝許之高煦遂夜焚兵器

及通逆文書。昧爽。帝移蹕城南。高煦出見。帝示以廷臣劾章。令爲書召諸子。改樂安州爲武定州。以陽武侯薛祿。兵部尚書張本鎮之。侍郎陳山請乘勝襲執趙王。楊士奇。楊溥力持不可。及還京師。帝語士奇曰。議者多言趙王事。奈何。士奇曰。趙最親。陛下當保全之。無惑羣言。帝乃遣駙馬都尉廣平侯袁容等。賫書及羣臣所上章至趙。趙王大喜。已泣曰。吾生矣。卽上表謝。且獻護衛言者頓息。

九月。帝還京師。廢高煦爲庶人。

王斌等皆伏誅。畿內山東諸都督指揮。以預謀誅死者六百四十餘人。戍邊者千五百餘人。高煦及諸子相繼死。

冬十月。釋李時勉於獄。復以爲翰林侍讀。

時勉旣下獄。至是復有言其得罪先帝者。帝震怒。命校尉縛以來。已又使卽斬西市。毋入見。而時勉已爲前校尉縛至。帝遙見罵曰。爾觸忤先帝。疏何語。具數之。時勉曰。臣言諒闇中不宜近如嬪。皇太子不宜遠左右。帝聞氣稍平。時勉數至六事止。帝令盡陳之。對曰。臣惶懼不能悉記。帝意益解。曰。是第難言耳。草安在。對曰。焚之矣。

帝太息曰。忠臣也。立赦之。復其官。

大雷電雨。

未丁

二年春正月。南京地震。○二月。以陳山為謹身殿大學士。

○夏四月。晉王濟熿有罪。廢為庶人。

濟熿既構陷濟熿。幽其父子空室中。蔬食不給。恭王宮中老嫗走訴成祖。盡得其構陷狀。乃命釋濟熿。封其子美圭為平陽王。畀以恭王故田。濟熿斬不與。仁宗屢詔諭之。不聽。高煦反。濟熿與通謀。其黨至京自首。寧化王濟煥亦奏其弑母。帝遣人察之。皆實。乃免為庶人。幽之鳳陽。同謀者皆伏誅。

松潘衛千戶錢宏以罪誅。

松潘衛當發軍戍交趾。衆憚行。宏因詭言番寇至。冀免調。又領軍突入麥匪諸族。逼取牛馬。而以大軍將致討。懾之。番衆驚走。遂約生番五萬人為亂。焚上下四關。及諸屯堡。又圍威茂。疊溪諸衛所。官軍屢戰皆敗。帝遣都督同知陳懷與指揮蔣貴合兵討之。而梟宏於松潘。以狗。明年正月。官軍連敗賊。復疊溪。招撫諸番三十餘寨。

松潘平。命懷鎮其地。

秋七月。令官吏軍民入米贖罪。

自死罪至笞四十。分十七等。納米百石至二石有差。納者。贓罪得不死。徒流以下皆復用。不能納者。雖笞杖。久繫不釋。往往至死。後以御史張純言。貧人罪輕者。始免追繫。

命都督僉事山雲鎮廣西。

柳慶蠻韋萬黃等。糾合猺獞。劫掠臨桂諸縣。鎮遠侯顧興祖坐逮。命雲佩征蠻。將軍印。充總兵官。率官軍討之。賊退保山巔。壘石於藤。俟官軍至。輒斷藤下之。莫敢近。雲夜束火牛羊角。以金鼓驅向賊。賊亟斷藤下木石。比明。木石且盡。衆譟而登。斬首萬餘級。賊降。雲乃築四城。九堡。傳舍九十餘區。以鎮要害。初。土官饋獻。帥率受之。然卒爲所持。雲聞府吏鄭牢剛直。召問曰。饋可受乎。牢曰。潔衣被體。一污不可復湔。將軍新潔衣也。雲曰。彼且疑。奈何。牢曰。黷貨法當死。將軍不畏天子法。乃畏土夷耶。雲曰。善。盡却之。由是土酋皆服。

八月。黃淮罷。○冬十一月。罷交趾布政司。

初仁宗立。遣中官山壽齎敕招黎利。而利已陷茶籠州。清化府。殺將吏。得敕。終無降意。陳智。方政。皆憚賊不敢進。帝初卽位。降敕切責。智等不爲意。時渠魁未平。而小寇蠭起。元年夏。命成山侯王通討之。至應平。遇伏大敗。叅贊尙書陳洽陷陣死。通被創走。懼賊甚。陰許爲利請封。而檄清化以南歸黎氏。帝復遣安遠侯柳升督師赴討。敕黔國公沐晟。自雲南引兵會之。未至。賊已攻陷昌江。圍交州。致書王通請和。及升至。利僞爲國人書。請立陳氏後。升不敢封。遣使奏聞。無何。升薄倒馬坡。遇伏死。後軍相繼陷沒。通遂大集官吏軍民。與利盟誓。約退師。至是。黎利遣使奉陳暲表至。求續封。帝心知其詐。欲藉此息兵。遂以表示廷臣。楊士奇。楊榮。力贊之。惟蹇義。夏原吉。不可。然帝意已決。廷臣不敢爭。遂命禮部侍郎李琦等。齎詔撫諭交趾。赦其罪。令具陳氏後人之實以聞。因敕利以興滅繼絕意。并諭王通及三司官。盡撤軍民北還。詔未至。通等已棄交趾還。官吏軍民得還者。八萬六千餘人。爲賊所殺。及拘留者。不可勝計。於是下通。及山壽。馬騏等於獄。論死。籍其家。

皇子生赦

帝年三十。胡皇后未有子。而孫貴妃有寵。乃陰取宮人子爲己子。帝以長子生。大喜。寵貴妃有加。

申戊

三年春二月立子祁鎮爲皇太子。

皇子生八日。廷臣卽請立爲太子。貴妃佯驚曰。后病痊。自有子。吾子敢先后子耶。帝不允。貴妃子遂立。

三月廢皇后胡氏立貴妃孫氏爲皇后。

太子旣立。帝遂令后上表辭位。乃退居長安宮。賜號靜慈仙師。而冊貴妃爲后。諸大臣張輔。蹇義。楊榮等。皆不能爭。后無過被廢。天下惜之。

夏四月詔自今官民建言。尙書都御史給事中會議以聞。

○閏月遣使撫輯河南流民。

工部郎中李新。自河南還言。山西饑民流徙南陽諸郡不下十餘萬。官司遣人捕逐。民愈窮困。死亡日多。帝卽遣官撫恤。發廩賑之。

秋七月以顧佐爲右都御史。

都御史劉觀以貪被黜。楊士奇。楊榮薦佐。廉公有威。尹京時政清弊革。帝立擢佐右都御史。賜敕獎勵。佐視事。

即奏黜御史不法及老疾者三十二人。朝綱肅然。佐性嚴毅。每旦趨朝。百僚皆旋折避之。入內直廬。獨處小夾室。非議政。不與諸司羣坐。人稱顧獨坐。

帝巡邊。敗兀良哈之衆於寬河。九月。還京師。

次石門驛。聞兀良哈萬餘人已入塞。乃留大軍於遵化。而自率精騎三千人。人二騎。持十日糧。出喜峯口。遇敵於寬河。帝親射其前鋒。殪三人。分鐵騎爲兩翼。夾擊之。兀良哈人馬死者過半。帝親率百餘騎追奔。虜望見黃龍旗。悉下馬羅拜。請降。明日。命諸將搜山谷。獲軍器馬駝。不可勝計。

冬十月。命太監郭敬鎮守大同。

武安侯鄭亨久鎮大同。治軍嚴肅。撫士卒有恩。常云。大同我國家後門。我死後。來者何人。幸勿壞我家事也。時內官在邊。總兵官畏之。惟亨與敬議事。無所撓。亨卒。敬始縱恣。

四年。春正月。兩京地震。○夏四月。詔賊吏不得贖罪。

御史王翱言。官吏害民蠹政。賊犯爲甚。今官吏罪無輕重。運磚復職。是貪黷者幸免。廉潔者鮮勸。非爲治之道。

也。請自今賊吏坐死。但許贖罪。不許復官。從之。未幾。文職有贓罪。納米者。吏部請降一級用。帝曰。納米乃一時之權宜。懲貪爲立國之大法。自今文職官吏犯贓者。悉依律治。

六月。初設鈔關。

戶部尙書郭資言。鈔法不行。由商居貨不稅。請行納鈔例。御史羅亨信。李奇。耿定。相繼言之。於是置溇縣。濟寧。徐州。淮安。揚州。上新河。許野。九江。金沙洲。臨清。北新。諸鈔關。量舟大小修廣。而差其額。謂之船料。不稅其貨。惟臨清。北新。則兼收貨稅。

冬十月。帝製猗蘭操。賜大臣。

詞曰。蘭生幽谷兮。騁騁其芳。賢人在野兮。其道則光。嗟蘭之茂兮。與衆草爲伍。於乎賢人兮。汝其予輔。又諭蹇義等曰。薦賢爲國。大臣之道。卿等宜勉副朕懷。

張瑛陳山罷。○十一月。命陽武侯薛祿帥師巡邊。

祿充總兵官。恭順侯吳克忠副之。都督譚廣。武安侯鄭亨爲後繼。

戊庚

五年春正月少保兼太子少傅戶部尚書夏原吉卒。

原吉有雅量嘗言處有事當如無事處大事當如小事若先自張皇則此中無主何能應事原吉與蹇義皆起家太祖時義秉銓政原吉筦度支皆二十七年時稱蹇夏。

二月下詔寬卹。

帝諭楊士奇欲蠲免災糧寬民間追償畜馬士奇對曰聖念及此真民生之幸也。但今當寬卹者尚不止此。因請免積欠薪芻量減官田租額部符採買當按土宜法司理刑務敦平恕工匠在京者宜分戶丁之半還家帝嘉納之遂下詔寬卹。

夏五月以况鍾等九人爲知府賜勅遣之。

帝以知府多循資格不稱任命大臣舉薦郎中况鍾趙豫莫愚羅以禮員外郎陳本深邵旻馬儀御史何文淵陳鼎俱授知府其冬復用薛廣等二十九人後鍾等多爲循吏有居官至一二十年者吏稱其職民安其業一時丞丞稱極盛焉。

六月遷開平衛於獨石。

洪武初李文忠克元上都設開平衛守之置八驛東接大寧古北口西接獨石永樂間大寧既棄而開平勢孤至是遂徙開平衛於獨石棄地三百里盡失龍岡灤河之險邊備益虛。

遣使捕畿內蝗。

諭戶部曰往年捕蝗之使害民不減於蝗宜知此弊因作捕蝗詩示之。

秋八月朔日食。

陰雨不見禮部請表賀不許。

命工部尙書黃福總理畿南山東河南淮北屯田尋罷。

福上言永樂間營建北京南征交趾北伐沙漠資用未嘗缺乏比國無大費而資用僅給卽不幸有水旱征調何以濟之臣請役操備營繕軍十萬人於濟寧以北衛輝真定以東緣河屯種歲可得米一百萬石帝善之遣郎中趙新等經理福總其事兵部尙書張本言軍民各有常業若復分營田役未免勞擾事遂不行。

辛亥

九月。以周忱爲工部侍郎。巡撫南畿。

故時蘇州府官田租。至二百六十二萬石。帝屢詔減之。忱與知府况鍾。曲筭累月。減至七十二萬餘石。他府亦以次減。民困獲甦。

冬十月。帝巡邊。至洗馬林。閱武而還。○十二月。兩京地震。

六年。夏六月。命黎利權署安南國事。

三年夏。李琦還自交趾。黎利遣使奉表謝恩。詭言陳暲物故。陳氏子孫已絕。國人推利守其國。以俟朝命。帝心知陳氏卽有後。利亦必不言。然以封利無名。復遣使齎勅諭利。及其國人。令遍訪陳氏子孫。并盡還官吏軍民及兵器之留其國者。利亦再遣使奉表。并具頭目耆老奏。堅言陳氏無後。帝乃遣禮部侍郎章廠。齎勅命利權署安南國事。利雖受朝命。其居國則稱帝。紀元順天。建交州府爲東都。清華府爲西都。分十三道。置百官。設學校。以經義詩賦二科取士焉。

秋七月。帝微行。

漏下十二刻。帝從四騎幸楊士奇宅。士奇倉皇出迎。頓首曰。陛下奈何以宗廟社稷之身自輕。帝曰。朕思卿一言。故來耳。居數日。獲二盜。有異謀。帝語士奇曰。今而後。知卿之愛朕也。

冬十月。令官軍兌運民糧。

初。陳瑄與黃福董漕事。議令江西。湖廣。浙江。及江南北諸郡民。轉粟於淮。徐。臨。清。而令軍士接運至京。至是。瑄上言。民運糧諸倉。往返經年。失悞農業。若令民兌與附近衛所官軍。運載至京。量地遠近。給耗米及道里費。則軍民交便。帝命黃福等議行之。更民運爲兌運。自此始。

十二月。中官袁琦有罪伏誅。

琦自幼侍帝。恃恩縱肆。擅遣內官內使。假採辦名。虐取官民財物。事覺。下錦衣衛獄。籍其家。金寶千萬計。服用僭侈非法。遂磔琦。併戮其黨十餘人。

金幼孜卒。

七年春正月朔日食。○賜中官金英。范洪。免死詔。○三月。

復下詔寬卹。

帝召楊士奇。諭曰。卹民詔下已久。今更有可卹者乎。士奇因請撫流民。減稅課。察貪吏。薦廉能。京官三品以上。及布按二司。各舉所知。備方面郡守選。軍民中有文學。勇畧者。羣臣察舉以聞。極刑家子孫。皆得仕進。帝從之。

夏六月。修天下府州縣倉。

巡按湖廣御史朱鑑言。洪武間。府州縣四鄉。皆置倉積穀。多者萬餘石。少者四五千石。倉設老人監之。富民守之。遇水旱。以貸貧民。今皆廢毀。宜遵舊制。俾旱澇有資。從之。

作官箴戒百官。

凡三十
五篇。

秋七月。揭豳風圖於殿壁。

帝閱內庫書畫。得元趙孟頫所繪豳風圖。賦詩一章。命侍臣書圖右。而揭諸便殿之壁。嘗夏日午朝退。咏聶夷中鋤禾日當午句。謂侍臣曰。吾每誦此。未嘗不念農人。

置蘇州府濟農倉。

故時公侯祿米。軍官月俸。皆蘇松民輸南京。戶部給之。石加米六斗。周忱請就給蘇松。止與船價米一斗。餘存米共四十萬石。并官錢所糴。共得米七十五萬石。有奇。又每歲民糧起運羨餘。存貯在倉者。曰餘米。皆書諸冊。而官掌之。貧民借貸。及綱運風漂盜奪者。皆資給於此。忱與况鍾定條約以聞。帝名其倉爲濟農。貧民不能償者。多不追取。忱在任二十年。百姓不知凶荒。兩稅未嘗逋賦。後之巡撫江南者。莫及焉。

八年秋九月遣使鞫天下重囚。

九年秋七月。瓦剌脫歡襲殺韃靼阿魯台於毋納山。

脫歡遣使來告。且獻玉璽。帝賜勅曰。王殺阿魯台。見王克復世仇。甚善。顧王言玉璽。傳世久近。殊不在此。王得之。王用之可也。賜遣之。阿魯台子阿卜只俺來歸。

九月帝巡邊至洗馬林閱武而還。

諸將言瓦剌獵所。去洗馬林不遠。襲之可大克也。帝召問楊榮。榮對曰。陛下屢遣人招諭。命其近邊獵牧。故感

恩而來。奈何擊之。且彼聞上至。必先遁。雖擊何益。徒失戎心耳。乃止。

冬十月。松潘番叛。都督僉事方政討平之。

松潘諸族。及空郎。龍溪。諸寨番叛。帝屢命陳懷討之。寇掠如故。乃召懷歸。命政與都督蔣貴討之。政至。榜諭禍福。威茂諸番悉降。惟松潘猶梗化。政等連破三十餘寨。寇平。遂留政鎮守松潘。

十年春正月。帝崩。太子祁鎮卽位。

遺詔國家重事。白皇太后行。時外廷傳言。太后取金符入內。欲召立襄王。楊士奇。楊榮。率百官入臨。請見太子。太后卽至乾清宮。攜太子泣曰。此新天子也。士奇等伏謁。呼萬歲。浮議乃息。

罷金銀硃砂銅鐵坑冶。免其課。○減稅鈔。

悉如洪武舊額。

少師兼吏部尙書蹇義卒。

義歷事六朝。凡五十年。性謙約。未嘗一語傷人。至議典法。不苟爲包容。上前所言。退未嘗洩。

二月尊皇太后爲太皇太后。

左右有請垂簾聽政者。太后曰。毋壞我祖宗法。第罷不急務。斥宮中玩好之物。時時勗帝嚮學而已。朝廷大政。羣臣白太后。太后令悉送內閣。俟楊士奇等議決。然後行。太后兄彭城伯景。都督昇。惟令朝朔望。毋得與聞國政。昇素賢。士奇等請加委任。太后終不許。

尊皇后爲皇太后。○封弟祁鈺爲郕王。○以禮部尙書楊

溥復入內閣預機務。

溥自四年秋。母喪起復。至是與楊士奇等復同直內閣。

三月放教坊司樂工三千八百餘人。○江西盜作亂。僉事彭森等討平之。

時連年水旱。有司不能賑恤。大盤山賊曾子良等爲亂。衆至三萬。屢撫不服。森與吉安知府陳本深率官軍民壯討之。斬子良。餘衆潰散。

後漢書卷之三
九
詔死罪必三覆奏。

其後太監王振擅權忤意者輒加誅戮不俟覆奏矣。

以元儒吳澄從祀孔廟。○夏六月。塋景陵。○秋七月。太白經天。○九月。釋御史陳祚主事郭循於獄。復其官。

宣德間。祚請講大學衍義。帝怒曰。祚以我爲未讀大學耶。命籍其家。逮其親屬。同下錦衣獄。婦女發浣衣局。時拓西內皇城。修離宮別館。循爲刑部主事。極諫。帝怒。命裏以璫。至大內。親詰之。循對不屈。帝射傷其顙。血流被面。亦下錦衣獄。至是皆赦。復職。

以王振掌司禮監。

振狡黠多智。事仁宗於東宮。宣德初。寢用事。帝爲太子。朝夕侍左右。及卽位。命掌司禮監。寵任之。

冬十月。詔天下衛所皆立學。○十一月朔。日食。○命楊士奇。楊榮。楊溥。議臣民章奏。

丙辰

太皇太后委任三人。三人同心輔政。士奇有學行。通達國體。榮謀而能斷。溥有雅操。淳謹小心。每議事。士奇引古義。榮出一言決之。諸大臣爭可否。或有違言。溥舍已從人。畧無繫吝。時論賢之。號三楊。

阿台寇甘肅。總兵官陳懋擊敗之。

阿魯台既死。其故所立阿台王子。及所部朵兒只伯等。復爲脫脫不花所窘。竄居亦集乃路外。爲納款。而數入寇甘涼。至是陳懋連擊敗之。追至蘇武山而還。

英宗睿皇帝正統元年春正月。發京軍屯田畿輔。

楊士奇言。國家歲用糧儲。皆自東南轉運。軍民勞苦。今京軍操練外。餘卒尙多。宜令於北京八府屯田。可省南方轉運之費。從之。

三月。始御經筵。

楊士奇。楊榮。楊溥。請開經筵。并擇老成重厚。識達大體者數人。以供侍講之職。太皇太后然之。命士奇。榮。溥。及侍講學士王直等。爲經筵官。每十日會講。文華殿。餘日仍令講讀官四人。入講經史。

夏五月。始置提調學政官。

戶部尚書黃福言。比來生員。學藝疎淺。宜令布政按察二司。遍歷考試。庶得真才。於是南北直隸。各置御史一員。餘置按察司僉事一員。提調學政。

秋七月。復聖賢後裔。

令有司訪求衍聖公。及宋儒周敦頤。程顥。程頤。司馬光。朱熹。後裔。蠲其徭役。祠墓傾圯者修之。

兩畿。山東。河南。陝西。湖廣。廣東。大水。○八月。始徵金花銀入內庫。

國初金花銀解南京。供武臣俸。諸邊有急。亦取給焉。至是始改解內庫。嗣後除武官俸外。皆爲御用。不以給邊。

九月。封黎利子麟爲安南國王。

初利死。以其子麟權知國事。至是帝以陳氏宗支旣絕。麟事朝廷甚恭。遂遣使齎勅印。往封之。

冬十一月。詔廷臣舉堪任御史知縣者各一人。○十二月。

已丁

下兵部尚書王驥於獄。尋釋之。

驥議邊事。五日未奏。帝怒。執驥及右侍郎鄺埜下獄。尋釋之。未幾。右都御史陳智劾張輔回奏稽延。并劾科道不舉奏。帝釋輔不問。杖御史給事中各二十。帝以冲年踐阼。慮羣下欺已。治尚嚴。而中官王振假以立威。屢撫大臣小過。下獄。荷校者無虛歲。

二年夏五月。遣王驥經理甘肅邊務。

韃靼阿台及朵兒只伯數寇甘涼。邊將屢失利。帝命驥往。許便宜行事。驥疾馳至軍。問往時追敵魚兒海子。先退者誰。僉曰。都指揮安敬。遂縛敬斬轅門。諸將皆股栗。驥乃大閱將士。分兵畫地。使各自防禦。邊境肅然。俄阿台復入寇。驥遣都督蔣貴爲前鋒。而自與都督任禮統大軍出塞。轉戰千餘里。馘虜酋五十餘人。降其部落。窮追至黑泉。朵兒只伯遠遁。

詔旌出穀賑荒者爲義民。復其家。○六月。以宋儒胡安國。蔡沈。真德秀。從祀孔廟。○秋九月。以指揮僉事楊洪守備。

獨石堡。

洪初副李謙守備赤城獨石。嘗勵將士殺敵。謙笑曰。徒殺吾人耳。敵可盡乎。御史張鵬劾罷謙。遂以洪代。洪紀律嚴明。烽堠修飭。數與兀良哈戰。斬其酋。威名聞嶺北。稱楊王。

三年春三月。京師地震。○夏四月。置大同馬市。

與瓦剌互市也。

六月旱。錄囚。○秋。陝西饑。

令雜犯死罪以下。輸銀贖罪。送邊吏易米賑之。

冬十一月。逮天下逋逃工匠四千餘人。

宣德間。大興土木。徵天下軍民工匠。帝卽位。悉罷之。未幾。建宮殿。修九門。改造五府六部諸司公署。又建京城內外諸佛寺。工役繁興。匠多逃者。二年二月至是。已逮一萬六百餘人。後又逮萬人。皆桎梏赴工。六年夏。以盛暑始脫其桎梏。

未已

申庚

四年春三月遼王貴烺有罪廢爲庶人。

貴烺杖殺長史。咎荊州知府爲撫按官所劾。帝亦聞其內亂。召訊具伏。廢爲庶人。

夏六月彗星見。○京師地震。

五年春正月少保戶部尙書黃福卒。

福歷事六朝。多所建白。安南貢使入朝。或指福問曰。識此大人否。對曰。南交草木。亦知公名。安得不識。其卒也。贈諡不及。士論惜之。

二月以翰林院侍講學士馬愉。侍講曹鼐。入內閣預機務。

王振至內閣。語楊士奇。楊榮曰。朝廷事久。勞公等。公等皆高年。倦矣。當若何。士奇曰。老臣盡瘁報國。死而後已。榮曰。不然。吾輩衰殘。無以効力。當擇後生可任者。報聖恩耳。振喜而退。榮曰。彼厭吾輩矣。及此時進一二賢者。同心輔政。尙可爲也。士奇以爲然。翌日。列愉。鼐。及侍講學士苗衷。侍講高穀。四人名以進。愉。鼐。遂先被擢用。

夏六月度僧道二萬餘人。○秋七月遣侍郎何文淵等分

行天下修荒政。

從楊士奇請也。時太皇太后專以養民爲務。每四方水旱賑濟動億萬計。蠲免災糧。或數百萬石。閭閻安樂。雖災不爲害。迨王振用事。悉反初政。惟蠲租賑荒。尚仍之不改云。

少師謹身殿大學士楊榮卒。

榮疏闔果毅。歷事四朝。謀而能斷。成祖初。與解縉等七人同入閣。榮最少。警敏。一日寧夏報被圍。成祖示以奏。榮曰。寧夏城堅。人皆習戰。奏上已十餘日。圍解矣。夜半奏至。圍果解。成祖與諸大臣議事未決。或至發怒。榮至。輒霽威。事亦隨決。李時勉。夏原吉。皆以榮言得無死。卒諡文敏。

冬十一月妖僧楊行祥伏誅。

廣西僧楊行祥。僞稱建文帝。械送京師。下詔獄。瘐死。

六年春正月朔。欽天監奏日食不應。

禮官請表賀。不許。

以蔣貴爲平蠻將軍。王驥總督軍務。討麓川蠻。破之。

洪武中。思倫發內附。授麓川宣慰司使。已而分其地爲孟養。木邦。孟定。三府。而以潞江。干崖。大侯。灣甸。四長官司隸焉。思倫發死。其子思任發黠桀喜兵。會緬甸作亂。遂乘釁據麓川。掠旁近地。攻陷騰衝。屢詔撫諭。不服。四年夏。命方政會沐晟。沐昂。討之。政至上江。全軍俱沒。晟懼罪。暴卒。勅昂代總其軍。卒無功。昂請發兵分道進。并圖山川險易以聞。侍郎何文淵。侍講劉球。皆言不可。而王振欲示威四夷。遂命貴等。會諸道兵十五萬討之。至冬。搗賊巢。破其象陣。斬馘萬計。思任發攜二子走孟養。驥留兵守之而還。進貴爵定西侯。封驥靖遠伯。

三月。下巡撫侍郎于謙於獄。旣而釋之。

謙巡撫山西河南十二年。威惠大行。每入京。無私謁。王振啣之。謙以在外久。乞召還。舉叅政王來孫原貞自代。右通政李錫阿振指劾謙以久任不遷。怨望。擅舉人自代。會謙來朝。遂下法司論死。繫獄三月。得釋。左遷大理少卿。山西河南吏民伏闕上書。請留謙者以千數。乃命復原官。

夏五月。太白經天。○遣使錄囚。○秋九月。奉天華蓋謹身

戊壬

三殿乾清坤寧二宮成。

永樂中。宮闕未備。三殿成而復災。以奉天門爲正朝。至是宮殿成。宴百官。

冬十月。進蘇州知府况鍾吉安知府陳本深秩正三品。

鍾本深。治行爲天下最。秩滿九載。當遷。部民乞留。詔予正三品。仍視府事。及二人卒。郡人立祠祀之。

七年。夏四月。直隸河南蝗。○五月。立皇后錢氏。○六月。遣

戶部侍郎焦宏備倭。

倭屢入寇。命宏整飭浙江。備倭事。兼理蘇松福建。

冬十月。太皇太后張氏崩。○十一月。瓦剌遣使入貢。

故事。瓦剌使止三十餘人。其後利朝廷賞賚。所遣動以千計。大同供應費。至三十餘萬。巡撫盧睿。戶部侍郎劉中敷等。俱以供饋有缺。至下獄。是年春。帝亦以貢使太多。限三百人入關。其秋。至大同者。復二千餘人。旬日又百餘人。帝悉納之。使人以馬易弓。藏於衣篋。不可勝計。巡撫羅亨信。請於居庸關詰檢之。帝不許。鎮守太監郭

亥癸

敬歲造箭鏃數十甕。
遺其使。帝亦不問。

十二月。葬誠孝皇后。

八年春正月。以王直爲吏部尙書。

直子爲南京國子監博士。考滿至京。選司欲改
北學以待直。直曰。是亂法自我始矣。固止之。

夏五月。復遣王驥。蔣貴。征麓川蠻。

思任發之走孟養也。詔能禽獲者。卽以麓川地與之。未
幾。緬人禽思任發。挾以求地。而其子思機發。方據麓川。
乃命驥等合兵討之。大軍逼緬。緬人以樓船來覘官軍。
而潛以他舟載任發遁。驥趨者藍。搗思機發巢。機發亦
遁去。俘其妻子部衆。立隴川宣慰司而還。後二年。緬
人始以思任發來獻。總兵官沐昂斬之。函首送京師。

雷震奉天殿。○六月。太監王振殺翰林院侍講劉球。

球應詔言事曰。自古帝王。政自己出。則權不下移。太祖
太宗。日視三朝。進大臣於便殿。裁決庶政。陛下臨御。今
已九年。願守二聖之成規。復親決之故事。古之擇大臣
者。必詢諸左右。大夫國人。及其有犯。雖至大辟。亦不加

刑。第賜之死。今用大臣。未嘗皆出公論。及有小失。輒桎梏箠楚之。未幾又復其職。甚非所以敬大臣也。今之太常。卽古之秩宗。今卿貳皆缺。宜選習禮儒臣。使領其職。古者人君不親刑獄。悉付理官。邇者法司所上。多奉勅增減。法司不能執奏。或先觀望。以爲輕重。民以多寃。至運磚納米。尤非古法。且使貪者幸免。廉者蒙辜。宜皆停罷。京師營作。已五六年。曰不煩民而役軍。軍獨非國家赤子乎。今營築多完。宜罷工。以蘇人力。麓川連年用兵。死者十七八。軍資爵賞。不可勝計。今又遣將遠征緬甸。責獻思任發。假使得寇以歸。不過獻諸廷。梟諸市而已。然彼挾以爲功。必求與木邦分地。不與則致怨。與之則兩夷坐大。是減一麓川。生二麓川也。設有蹉跌。兵爭無已。死者必多。迤北貢使日增。包藏禍心。誠所難測。宜分遣給事御史。督視官軍。及時訓練。毋使借工各廠服役私家。仍公武舉之選。以求良將。定召募之法。以求武勇。廣屯田。公鹽法。以厚蓄儲。庶武備無缺。而外患有防。疏入。下廷議。惟從其擇。太常寺官一事。欽天監正彭德清倚振爲奸。公卿多趨謁。球絕不與通。德清恨甚。遂摘疏中攬權語。激振怒。下球錦衣衛獄。囑馬順殺球。順深夜攜一小校。持刀至球所。球方臥。起立。大呼太祖太宗。校前斷其首。血流被地。體猶植立。支解之。瘞獄戶下。

下大理寺少卿薛瑄於獄。既而釋之。

瑄有學行。人稱爲薛夫子。初爲山東提學僉事。王振問楊士奇。吾鄉有可爲京卿者乎。士奇以瑄對。召爲大理少卿。瑄至。士奇使謁振。瑄曰。拜爵公朝。謝恩私室。吾不爲也。一日。會議東閣。公卿見振皆趨拜。瑄獨屹立。振趨揖之。自是卿瑄會指揮某死。振從子山欲強娶其妾。誣指揮妻毒殺夫。處極刑。瑄辨其冤。三却之。都御史王文承振指。劾瑄受賄。故出人罪。下獄論死。將行刑。振蒼頭忽泣於爨下。問故。曰。聞薛夫子將刑也。振感動。會兵部侍郎王偉亦申救。乃免。

秋七月。枷祭酒李時勉於國子監門。三日釋之。

時勉與南祭酒陳宗敬並有學行。時稱南陳北李。王振詣國子監。時勉不爲屈。振廉其過。無所得。時勉嘗芟葵倫堂樹旁枝。遂坐以擅伐官樹。枷於署門。監生石大用。李貴等三千餘人。上疏救。不納。會昌侯孫忠。太后父也。忠生日。太后使人賜其家。忠言。今歲生辰殊不樂。以公卿皆集。獨李先生荷校不至耳。太后言於帝。帝始知而釋之。

冬十一月。宣宗廢后胡氏卒。

初張太后閔后賢而見廢。召居清寧宮。善遇之。太后崩。后痛哭。踰年亦殂。用嬪御禮塋金山。

御撰資治通鑑綱目三編卷六

御撰資治通鑑綱目三編卷七

起甲子明英宗正統九年
盡丙子明景帝景泰七年凡十三年

子甲

九年春正月遣成國公朱勇等擊兀良哈敗之。

兀良哈數寇邊。詔發兵四萬擊之。朱勇出喜峰口。都督馬亮出劉家口。興安伯徐亨出界嶺口。都督陳懷出古北口。踰灤江。渡柳河。破福餘於全寧。復破泰寧。朶顏於虎頭山。三衛大困。其後邊將復屢擊敗之。三衛益怨。遂導瓦剌入寇。

三月帝視國子監。

以新作國子監成也。

少師華蓋殿大學士楊士奇卒。

士奇公正持大體。雅善知人。好推轂寒士。卒年八十。謚文貞。

夏四月以翰林學士陳循入內閣預機務。○秋閏七月復

開福建浙江銀場。

帝初卽位。詔封坑冶。福建叅政宋彰。浙江叅政俞士悅。以礦盜日熾。言開銀場。則利歸於上。而盜無所容。浙江按察使軒輊。力持不可。乃止。至是。礦盜葉宗留。陳湖鑑等。殺福建叅議竺淵。中官及言利諸臣。爭請開礦。乃命戶部侍郎王質經理之。定歲課。福建銀二萬餘。浙江四萬餘。而官屬供億費。較課銀尙過之。自是民困而盜益衆。

八月。勅諸將嚴邊備。

也先兇狡桀驁。北部皆服屬。惟兀良哈未附。也先屢擊破之。又結婚沙州赤斤諸衛。却制哈密。巡視陝西都御史陳鑑。以聞。帝敕諸將嚴爲備。

冬十月朔日食。○戊御史李儼於鐵嶺衛。

儼在光祿寺監收祭物。王振過之。怒其應對不跪。下錦衣衛獄。謫戍之。時振以義子馬順掌鎮撫司。官無大小。悉送順拷訊。戕害甚衆。順大通賄賂。廷臣莫敢言者。

丑乙

十年春二月。京師地震。○夏四月朔。日食。○命舉州縣官

治行卓異者。

擢知縣楊瓚。王懋等爲知府。瓚言民間子弟可造者衆。請增廣生員。毋限額。禮部採瓚言。考取附學。天下學校之有附學。生自瓚始。

秋七月。下霸州知州張需於獄。戍之。

需見民遊食者多。每里置簿。列男女大小口數。計其耕桑樹畜。爲設方畧。暇則躬自巡視。有不如教者。罰之。民皆勤力。州以饒富。有中官牧馬。擾民者。需笞其校卒。中官譖於王振。執下錦衣衛獄。箠楚幾死。詔戍邊。

冬十月。以兵部侍郎苗衷。工部侍郎高穀。入內閣預機務。

十一年春正月。異氣見。奉天華蓋二殿。○夏六月。京師地

震有聲。○秋七月。增市稅。

先是以于謙言。天下稅課司局。課鈔不及三萬貫者。悉罷之。領其稅於有司。上下稱便。至是戶部尙書王佐。請

增稅課。置彰義門官房。收商稅課鈔。天下稅課司一萬五千貫以上者。俱請復設。征權漸繁。

少保武英殿大學士楊溥卒。

溥質直廉靜。有雅操。自楊榮楊士奇卒。在閣者皆後進望輕。溥孤立。王振遂用事。及是卒。諡文定。

冬十二月大雨震電。

十二年春三月徙沙州衛於山東。

初成祖置哈密沙州罕東赤斤四衛於嘉峪關外。屏蔽西陲。至是沙州都督喃哥兄弟乖爭。部眾携貳。喃哥請入居肅州。已而意中變。甘肅總兵官任禮乘其饑窘。以兵迫收之。帝命分處其眾於山東。自是沙州地爲罕東所併。諸衛亦漸不能自立。肅州遂多事。

秋八月朔日食。○九月馬愉卒。○冬十一月以宋彰爲福建左布政使。

彰交趾人。爲福建叅政。與都指揮僉事鄧安進表至京。以萬金饋王振。又囑安具疏薦之。遂遷布政使。抵任後。

戊辰

百計侵漁。
民不堪命。

十三年春二月。以宋儒楊時從祀孔廟。○三月。復遣王驥

征麓川蠻。

思機發竊據孟養地。屢遣使入貢謝罪。中外咸願罷兵。王振意終未慊。要令躬入謝。不至。於是復命驥總督軍務。宮聚爲平蠻將軍。統兵十五萬討之。明年春。渡金沙江。至鬼哭山。破其十餘柵。而思機發終脫去。官軍踰孟養。至孟那海。地在金沙江西。去麓川千餘里。驥慮大軍遠涉。餽餉不繼。急謀引還。時思機發弟思陸復據孟養。驥度賊終不可滅。乃立石表金沙江上。與思陸約誓曰。石爛江枯。爾乃得渡。遂旋師。議者咎驥等三征麓川。以一隅騷動天下。會川衛訓導詹英劾。驥掩殺冒功。王振左右之。得不問。

夏五月。禁用銅錢。

洪武中。鈔一貫折錢千。至是止折錢三文。帝從御史蔡愈濟言。詔交易用錢者。以阻鈔論。追一萬貫。全家戍邊。至天順中。乃弛其禁。

秋七月。河決河南。

一自新鄉漫曹濮。抵壽張沙灣。壞運道。東入海。一自滎澤。經祥符陳留。歷唯毫。至懷遠界。入淮。淹地二千餘里。壞城垣廬舍。溺死男婦。不可勝計。

京師蝗。○罷保舉。

宣德朝。保舉得人最盛。後漸奔競。教諭傅璿給事中。余忭御史。涂謙屢以爲言。遂罷之。

八月。沙縣盜鄧茂七作亂。遣御史丁瑄捕斬之。

茂七。江西人。亡命入福建。聚衆爲亂。會宋彰爲虐。從賊者益衆。遂大剽掠。攻沙縣尤溪。圍延平。全閩震動。帝遣瑄。及都督劉聚。僉都御史張楷。率軍進勦。未克。復命寧陽侯陳懋等爲將軍。刑部尙書金濂。叅軍務。往討。比至瑄已大破賊。茂七死。衆復擁茂七兄子拒官軍。濂以計破禽之。會瓦剌構難。召懋等還。明年春。瑄陰致賊黨爲間謀。誘賊來攻。伏兵奮擊。指揮劉福追斬之。至景泰初。餘黨始平。

冬十月。幸大興隆寺。

巳己

王振佞佛。請帝歲一度僧。修大興隆寺。役軍民萬人。糜帑數十萬。既成。延崇國寺僧主之。帝親傳法稱弟子。

十四年春正月。太白晝見。夏五月。命太監金英同法司錄囚。以翰林院侍讀學士張益入內閣預機務。六月。旱。熒惑入南斗。謹身等殿災。

是夜大風雨。明日殿基生荆棘。高二尺。詔修省大赦。

秋七月。瓦剌分道入寇。

初也。先索中國財物。無不許。使來增至三千人。復虛張其數。以冒廩餽。禮部覈實予之。所請又僅得五之一也。先大恚。遂誘挾諸部。分道大舉入寇。脫脫不花以兀良哈寇遼東。阿剌知院寇宣府。圍赤城。別將寇甘肅也。先從大同入。至貓兒莊。叅將吳浩戰死。西寧侯宋瑛武進伯朱冕與也先戰於陽和。俱敗歿。監軍太監郭敬伏草中得免。諸邊守將皆逃匿。

帝親征。命郕王祁鈺居守。

邊報日數十至。王振勸帝親征。兵部尚書鄭瑄侍郎于謙力言六師不宜輕出。王直率百官再三諫。俱不聽。遂發京師。振及英國公張輔尚書侍郎以下官軍私屬五十餘萬人。倉卒就道。軍中常夜驚。出居庸關。至宣府。風雨大至。邊報益急。羣臣交章請留。振益號怒。大將朱勇膝行聽命。尚書王佐鄭瑄忤振意。跪草中。至暮不得請。欽天監正彭德清告振曰。象緯示微。再前恐危。乘輿振曰。倘有此。亦天命也。學士曹鼐曰。臣子不足惜。主上係宗社安危。豈可輕進。振終不聽。至陽和。伏屍滿野。衆益危懼。

八月。帝至大同。詔班師。次土木。師潰也。先以帝北去。

帝至大同。王振尚欲北行。郭敬密止之。始班師。振初議從紫荆關。由蔚州。邀帝幸其家。既恐蹂其鄉。禾復改道宣府。鄭瑄再上章。請疾驅入關。嚴兵爲殿。不報。又詣行殿申請。振怒曰。腐儒安知兵事。再言必死。叱左右掖出之。及發宣府也。先兵襲軍後。恭順侯吳克忠及其弟都督克勤禦之。力戰死。後軍潰散。畧盡。成國公朱勇永順伯薛綬帥師四萬往援。全軍俱覆。次日至土木。日未晡。去懷來僅二十里。衆欲入保城中。振輜重未至。留待之。卽駐營土木。掘井二丈餘。不得水。人馬饑渴。虜分道自旁近口入。都指揮郭懋拒戰。終夜。敵益增。明日圍御營。

不得發也。先遣使請和。帝詔曹鼐、草敕許之。虜佯退。振遽令移營。回旋間。行列已亂。虜大呼。四面蹂躪入。衆裸袒蹈藉死。帝與親軍突圍不得出。下馬據地坐。敵擁之去。中官喜寧從。振等皆死。官軍死傷者數十萬。英國公張輔、泰寧侯陳瀛、駙馬都尉井源、都督梁成、王貴、尙書王佐、鄭埜、侍郎曹鼐、學士張益等五十餘人皆死。帝旣入敵營。敵以校尉袁彬來侍也。先擁帝至宣府。傳諭楊洪。羅亨信開門出迎。城上人對曰。所守者陛下城池。日暮不敢奉詔。乃復擁帝至大同。索金幣。都督郭登謀奪駕入城。不果也。先遂擁帝北行。

皇太后命郕王監國。立皇子見深爲皇太子。

時京師疲卒羸馬不滿十萬。人心洶洶。羣臣聚哭於朝。議戰守。侍讀徐理請南遷。于謙曰。欲遷者可斬。京師天下根本。一動則大事去矣。請速召勤王兵。誓以死守。學士陳循尙書胡濙力贊之。守議遂定。太后命郕王總百官。徵兩畿山東河南江北軍入衛。分遣大臣撫安軍民。

以于謙爲兵部尙書。

謙上言。京營兵械且盡。宜亟遣官募義勇。繕兵甲。修戰具。分兵九門。列營郭外。徙附郭居民入城。通州倉糧令

官軍自詣關支。母棄以資敵。文臣如軒輊。武臣如石亨。楊洪。柳溥。皆宜倚任。至軍旅之事。臣請以身當之。王深納焉。

籍王振家夷其族。

郕王攝朝。諸臣請族誅王振。振黨馬順。叱羣臣退。於是給事中王絃。廷擊順。衆隨之。爭捶順死。朝班大亂。衛卒聲洶洶。王懼欲起。于謙直前掖王止。請王宣諭百官。允其請。衆乃定。尋執王山至。令縛赴都市。磔之。振族無少長皆斬。籍其家。得金銀六十餘庫。玉盤百。珊瑚高六七尺者五十株。他珍玩無算。時山西巡撫朱鑑。山東布政使裴綸。並請罷監軍。及鎮守中官。不報。

召前大理寺少卿薛瑄。○以翰林院修撰商輅。彭時入內閣預機務。

以陳循高穀舉也。彭時以繼母喪。乞終制。不許。

九月。皇太后命郕王卽位。赦。

廷臣合辭請太后曰。車駕北狩。皇太子幼冲。古云。國有長君。社稷之福。請定大計。以安宗社。太后允之。王驚讓再三。羣臣固請。會都指揮岳謙。使瓦刺還。口傳帝旨。以王長且賢。令繼統。以奉祭祀。王始受命。以明年爲景泰元年。

遙尊帝爲太上皇帝。○減浙江福建銀場課。○以郭登爲總兵官。鎮大同。

時大同壁壘蕭條。城門晝閉。登慷慨奮勵。修城堞。繕器械。拊循士卒。弔死問傷。親爲裹創。傳藥曰。吾誓與此城存亡。不令諸君獨死也。登初至。士卒堪戰者纔數百。馬百餘匹。不數年。馬至萬五千。精卒數萬。大同兵遂爲天下最。

南海盜黃蕭養作亂。討平之。

蕭養以行劫繫獄。夜破械出。劫軍器局爲亂。集衆至萬人。進圍廣州。總兵張安敗死。指揮僉事王清被殺。圍三月不解。鄉民避賊至城者。皆不納。歸則盡爲賊殺。從賊者益衆。帝遣僉都御史楊信民討之。信民至。開城門。發

倉廩。獎勵士卒。招降脅從者數萬人。蕭養剋期請降。會信民卒乃止。明年四月。都督董興討定之。

冬十月。以于謙提督各營軍馬。也先入紫荆關。

九月中。瓦剌入紫荆關。寇易州。涑水。僉事左能棄關走。敵從容開關去。至是也先弟大同王等復入關。僉事韓青提督副都御史孫祥戰死。詔宣府遼東總兵官及山東河南山西陝西巡撫皆入援。

也先犯京師。于謙統諸將擊却之。

也先長驅至京師。次蘆溝。以上皇至土城。叛閩喜寧。嗾也先邀大臣迎駕。索金帛萬萬計。廷臣欲議和。謙力持不可。敵窺德勝門。謙令石亨設伏誘敵。敵以萬騎來薄。伏兵起擊之。也先弟孛羅。平章卯那孩。中礮死。寇轉戰至彰義門。都督高禮。毛福壽等擊却之。還至土城。居民升屋呼號。投磚石擊敵。囂聲動地。也先初輕中國。既至。相持五日。戰不利。意稍沮。又聞勤王兵且至。遂擁上皇由良鄉西去。大掠所過州縣。出紫荆關。帝以石亨于謙功大。進亨武清侯。加謙少保。命昌平伯楊洪充總兵官。勦畿內餘寇。

瓦剌脫脫不花遣使入貢。

時瓦剌君臣鼎立也。先專國。兵最多。脫脫不花雖爲可汗。兵較少。阿剌知院兵又少。三人外親內疎。其合衆南犯。利多歸也。先而害則均受。至是可汗遣使來貢。帝從胡濙王直等議。厚賞賜以間之。

十一月。修沿邊關隘。○以左都督朱謙鎮宣府。僉都御史王竑鎮居庸關。

于謙言。宣府。京師之藩籬。居庸。京師之門戶。乞遣重臣鎮守。乃以謙鎮宣府。紀廣。楊俊。輔之。竑及夏忠。魯瑄。守居庸關。

十二月。尊皇太后爲上聖皇太后。尊賢妃吳氏爲皇太后。立皇后汪氏。○也先犯寧夏。

喜寧勸也先西犯寧夏。掠苑馬。直趨江表。居上皇南京。袁彬謂上皇曰。天寒道遠。陛下又不能騎。徒取凍餓。且至彼而諸將不納。奈何也。先聞之。怒。欲殺彬。上皇力解乃止也。先遂自寇寧夏。掠人畜。期月始退。仍留數千人於河套。時入寧夏爲寇。

庚午

景皇帝景泰元年春正月朔罷朝賀。

以上皇在
瓦刺也。

始令輸納者給冠帶。

戶部議令軍民輸納者給冠帶。官吏罪廢者輸草於邊得復職。帝用給事中翟敬議祇給冠帶。其後監生郭佑上言農工商賈不較賢愚惟財是授。驕親戚誇鄉里長非分之邪心。賊污吏罷退爲民欲掩閭黨之耻。納粟納草冠帶還鄉。前以貪貨去職。今以輸貨得官。何以禁貪殘。重名爵。况天下一統藏富在民。未至六不得已而舉措如此。是適以空乏啟戎心也。章下廷議格不行。

郭登敗瓦刺於栲栳山。

寇入大同至沙窩。登奮擊破之。追奔四十餘里。至栲栳山。自土木敗後。邊將無敢與寇戰。登以八百騎破寇數千。軍氣一振。捷聞。封定襄伯。後寇數至。登屢擊却之。

二月帝耕藉田。○遣武清侯石亨都指揮同知楊能巡邊。

帝用于謙議遣石亨率京軍三萬巡大同。楊能統京軍一萬五千巡宣府。未幾大同叅將許貴奏言也先請和。下兵部議于謙言我與也先不共戴天。理不可和。萬一和而彼肆無厭之求。從之則坐困。不從則速變。貴居邊疆重任。恒怯如此。法當誅。自是邊將無敢言和者。

三月瓦剌復分道入寇。

陽和。大同。偏頭關。野狐嶺。萬全衛皆被寇。時邊將禦敵互有殺傷。惟寧夏。慶陽。朔州被殺掠甚衆。

錄土木死事諸臣後。○夏四月旱。○五月總督侍郎侯璉破貴州蠻。

時羣蠻西至龍里。東至沅州。北至武岡。南至播州。不下二十萬。平越被圍已一年。城中食盡。掘草根煮弩革食之。巡按御史黃鎬置疏竹筒中募土人乞援於朝。命保定伯梁瑄都督方瑛會湖廣總督侯璉率師進討。瑄未至璉檄諸將合兵勦之。破八十餘寨。平越圍解。已復與方瑛等破二百餘寨。明年春蠻衆縛其酋以降。

朱謙敗瓦剌兵於宣府。

瓦刺二千騎屯賈家營。謙與叅將紀廣等力戰却之。封謙撫寧伯也。先擾宣府大同。意二城可旦夕下。而謙與郭登數以羸師挫其勁騎也。先由是氣沮。

秋七月也。先遣使請和。遣右都御史楊善等報之。

也。先挾上皇要素。皆以喜寧為謀主。于謙密令大同守將擒寧戮之。又因謀用間也。先始有意歸上皇。遣使通款。至是見中國無釁。滋欲和。使者頻至。王直等議遣使奉迎。帝不懌。曰。吾非貪此位。而卿等強樹焉。今復作紛紜何。眾不知所對。于謙從容言曰。天位已定。寧復有他顧理。當奉迎。萬一彼果懷詐。我有辭矣。帝意始釋。先後遣給事中李實。右都御史楊善等齎書幣如瓦刺。

八月。上皇至自瓦刺。入居南宮。○赦。

楊善至瓦刺也。先問曰。兩家和好久。今奈何削我馬價。予帛多剪裂。前後使人往。多不歸。又減歲賜。善曰。非削也。太師馬歲增。而不忍拒。故微損之。太師自度價比前孰多。帛剪裂者。通事為之。即太師貢馬有劣弱。貂或敝。豈太師意耶。且使者多至三四人。有為盜。或犯他法。故自亡去。留之何用。貢使受宴賜。朝廷核實與之。所減

乃虛數耳也。先稱善。善因言。太師再攻我。屠戮數十萬。太師部曲死傷亦不少矣。今還上皇和好如故。中國金幣日至。不亦美乎。也。先曰。勅書何以無奉迎語。善曰。此欲成太師令名。使自爲之。若載之勅書。是迫於朝命。非太師誠心也。也。先大喜。遂設宴。餞上皇。上皇行也。先送數十里。遣其知院率兵衛送。而自與衆伏地羅拜。慟哭去。上皇將抵居庸。帝始令禮部具奉迎儀。旋傳旨。以一輿二馬迎於居庸關。給事中劉福言。禮太薄。帝曰。昨得上皇書。言迎駕宜從簡。損朕豈得違之。羣臣乃不敢言。會千戶龔遂榮爲書投高穀。言奉迎宜厚。引唐肅宗迎上皇故事。穀袖入朝。與王直等觀之。直與胡濙以書進。且言肅宗迎復禮。今日正可仿行。陛下宜躬迎安定門外。帝不從。上皇至。自東安門入。帝迎上皇居南宮。百官隨入朝謁。大赦天下。

苗衷罷。○以刑部侍郎江淵入內閣預機務。○九月御經筵。○冬十一月。禮部尚書胡濙請令百官賀上皇生日。不許。

未幾。濙又請明年正旦百官朝上皇於延安門。亦不許。

辛未

二年春正月。令軍民輸納者世襲武職。

都給事中。金達疏諫。不聽。其後給事中曹凱言。近輸豆四千石以上。得授指揮。彼受祿十餘年。費已償矣。復令世襲。是以生民膏血。養無功子孫。而彼取息長無窮也。有功者必謂吾以捐軀獲此。彼輸豆亦獲此。是朝廷以我軀命。等於菽粟。其誰不解體。乞自今惟令帶俸。不得任事。文職則止原籍帶俸。帝然之。命已授者如故。未授者悉如凱言。

度僧道五萬餘人。

于謙上言。今四方多流徙之民。三邊缺戰守之士。度僧太多。恐乖本末。帝不省。

二月。遣都督僉事孫安守備獨石。

初土木之變。楊洪入援。獨石等八城俱殘毀。議者欲棄之。于謙曰。棄之則不但宣府懷來難守。京師不免動搖。乃薦安。授以方畧。率兵守之。安招士卒修城堡。飭戰具。弔死問傷。流亡復業。八城遂完。

秋八月。南京地震。○復午朝。○冬十二月。廣通王徽。燂陽。

宗王徽燾謀逆廢爲庶人。

徽燾。惑家人段友洪。都事干利賓等言。作僞勅。分遣友洪。及蒙能。陳添仔等。以銀印金幣。誘諸苗爲亂。陽宗王徽燾。亦與通謀。友洪歸。爲鎮南王徽燾所執。有司以聞。帝廢徽燾。徽燾爲庶人。幽之京師。蒙能率苗兵二千至武岡。聞事敗。叛入廣西。稱蒙王。糾生苗三萬餘人。攻龍里。新化。銅鼓諸城。至七年夏。方瑛禽斬之。

立團營。

明初。京師兵隸五軍都督府。分中軍左右掖左右哨。謂之五軍營。兼馬步隊。專教陣法。已又置三千營。掌車輦旗纛。扈從出入。隊皆騎。後征交趾。得火器法。置神機營。隊皆步。各提督以勲臣內臣。所謂三大營也。于謙以營政久弛。兵將不相習。請選三營軍十萬。分五營團操。名曰五團營。其法五十人爲隊。隊有長。百人兩隊。有領隊官。千人有把總。三千五千人。有都指揮。體統相維。兵將相識。量敵多寡。以爲調發。謙又請益兵五萬。增爲十團營。仍各統以武臣內臣。而聽謙及石亨內臣劉永成。曹吉祥。節制。以選餘軍歸本營訓練。名曰老營。備居守。京軍之制一變。謙號令明審。目視指屈。口奏。悉合機宜。石亨等雖大帥。進退賞罰。一由謙。亨等受成而已。

以禮部侍郎王一寧祭酒蕭鎡入內閣預機務。○也先弑其主脫脫不花。

脫脫不花妻也。先姊也。先欲立其姊子為太子。脫脫不花不從也。先遂殺脫脫不花。收其妻子。來獻捷于謙。上言也。先雖悔過。摠誠遣使入貢。而罪大惡極。終不可容。今其君臣自相仇殺。是天授我復仇之機。臣請統團操軍馬。分往宣府大同討賊。帝不從。

三年春二月戶部尚書金濂有罪下獄尋釋之。

初帝即位。詔免景泰二年田租三分之一。濂檄有司。但減米麥。其銀布絲絹徵如舊。學士江淵以告。帝詰責戶部。濂言絲絹銀布。詔書未載。若概免。國計何資。言官交章劾之。遂下都察院獄。三日釋之。削太子太保。改工部。吏部尚書何文淵言理財非濂不可。遂復還戶部。

三月詔錦衣衛官刺事。○夏五月帝廢故皇太子見深為沂王立子見濟為皇太子。

初帝卽位。欲易儲。而難於發。遲回久之。太監王誠。舒良。爲帝謀。先賜陳循。高穀。百金。江淵。王一寧。蕭鏊。商輅。半之。以緘其口。然猶未發也。會廣西土官黃珙。以私怨戕其弟思明。知府瑯。滅其家。珙懼罪。遣使走京師。上疏。請帝密定大計。易建東宮。以一中外之心。絕覬覦之望。帝下廷臣會議。相顧莫敢言。司禮太監與安厲聲曰。此事不可已。卽以爲不可。勿署名。無持兩端。羣臣皆唯唯。署議。奏上。報可。卽日簡置東宮官。廢故太子爲沂王。立見濟爲太子。大赦天下。詔百官朔望朝太子。

廢皇后汪氏立妃杭氏爲皇后

帝初欲易太子。獨汪后不可。帝不從。后以太子杭妃所生。遂讓焉。

官顏孟二氏子孫各一人。六月建大隆福寺。

時太監與安用事。佞佛甚於王振。請帝建大隆福寺。費數十萬。踰年始成。帝剋期臨幸。鹽運判官楊浩諫止之。

秋七月殺內使王瑤。

御用監阮浪。侍上皇於南宮。上皇賜浪金袋刀各一。浪以與瑤。錦衣指揮盧忠見之。醉瑤酒而竊之。上變言浪

傳上皇命以袋刀結瑤圖復位帝震怒下浪瑤詔獄窮治之忠筮於術者同寅寅以大義折之且曰此大凶兆死不足贖忠懼佯狂以冀免商輅及中官王誠言於帝曰忠病風無足信不宜聽妄言傷大倫帝意少解乃並下忠獄坐以他罪謫廣西立功殺瑤錮浪於獄事得不竟

八月王一寧卒○九月江淵以母喪起復

初侍讀學士倪謙遭喪淵薦謙為講官謙遂奪哀至是御史周文言淵引謙正為今日地帝以事既處分不問詔自今羣臣遭喪毋濫保

冬十月以左都御史王文入內閣預機務

時閣中已有五人陳循最寵任高穀與循不相能以文彊悍欲引文自助乃請增閣員循舉其鄉人蕭維禎穀舉文文得中官王誠助遂入閣二品大臣入閣自文始文既居政府反與循比而不附穀

十一月朔日食○于謙請解總督軍務不許

帝知謙深所論奏無不從謙亦每事抒忠盡言無隱由是不任職者皆怨諸言官相繼彈劾帝破衆議用之謙

西癸

性剛。遇事有不如意。輒拊膺嘆曰。此一腔熱血。竟洒何地。石亨與謙共事。亨縱恣。謙每裁抑之。亨大恚。疏辭總兵官。不許。謙上言。祖宗朝。本無總督。邇因邊事棘。命臣兼領。今賊情未定。任將宜專。臣見石亨累奏辭職。以有臣爲之軒輊也。豈可以臣之駑鈍。使亨不得行其志。乞解臣總督軍務。俾亨專任其事。帝不許。○自上皇還京。後。瓦剌歲來貢。上皇所亦別有獻。於是帝意欲絕瓦剌。不復報使也。先數以爲請。王直、金濂、胡濙等相繼言。絕之。且啓。帝下兵部議。謙曰。臣職司馬。知戰而已。行人事非所聞。乃止。

遣使撫輯畿內。山東。山西。河南流民。

河南流民復業者。計口給食五年。畿內。山東。山西。逃民復賦役五年。

四年夏四月。始令生員納粟爲國子生。

開封教授黃鑾上言。納粟拜官。衰世有之。然未聞納粟貢士者也。今以浮薄不教之子。納粟進身。不數年。寄以民社。是猶驅狼虎以牧羣羊。欲其不恣啖噬。得乎。章下戶部議。不從。尋以胡濙言罷之。時戶部以邊儲不足。請令罷退官非贓罪者。輸米二十石。給誥勅。都給事中劉燁言。考退之官。多有罷軟酷虐。荒溺酒色。廉耻不立者。

非止贓罪已也。賜之詔勅。以何爲辭。若但褒其納粟。則是朝廷詔勅。止直米二十石。何以示天下後世。此由戶部尙書金濂不識大體。有此謬舉。帝爲立已之。

冬十月。以徐有貞爲左僉都御史。治沙灣河。

有貞初名理。以議南遷。爲帝所鄙。大臣累薦不用。遂更名有貞。時河決沙灣已七年。前後治者皆無功。廷議推有貞。乃擢左僉都御史治之。有貞至張秋。相度水勢。條上三策。一置水門。一開支河。一濬運河。議既定。乃治渠。起張秋金隄。引而西。凡數百里。經澶淵以接河沁。內倚古金隄以爲固。外恃梁山泊以爲泄。河流之旁出者。築九堰障之。閱五百五十日而工成。賜渠名廣濟。自是河水北出濟漕。阿鄆曹濮間。田出沮洳者百數十萬頃。乃濬漕渠。由沙灣北至臨清。南抵濟寧。復建八閘於東昌。以平水道。山東河患少息。

十一月。皇太子見濟卒。

五年春三月。命王文巡視江淮水災。

初。蘇松常鎮四府。每糧四石。折白金一兩。民以爲便。後戶部復徵米。令輸淮徐。凡二百餘萬石。率三石而致一。

石民多破家。文
以便宜停之。

減國子生額。

監生二千餘人。俱仰給官廩。以戶部侍郎孟鑑言。留年深者千餘人。餘放歸。

夏四月朔日食。○秋八月。令兩京市稅輸鈔。

時鈔法不行。令兩京市肆園場稅悉輸鈔。按月征之。商民以為病。或閉戶不敢市易。拔園蔬伐果木。以避之。給事中陳嘉猷言。兩京根本重地。軍民尤宜加恤。豈可當歲歉之時。興擾民之政。縱使鈔法通。而民已不聊生矣。詔蔬果等暫免納鈔。

冬十月也。先為阿剌所殺。

也先既弒脫脫不花。自立為田盛可汗。阿剌求為太師。不許。且殺其二子。阿剌怒。率眾攻也先。殺之。未幾。韃靼部孛來復殺阿剌。奪也先母妻。并其玉璽。求脫脫不花子麻兒立之。號小王子。自是孛來與其屬毛里孩等。皆雄視部中。韃靼勢復熾。

乙亥

六年春正月雨木冰。○錄囚。

時中外繫囚有至十餘年者。帝以災變。詔法司審錄寬獄。得減免者甚衆。

夏四月朔日食。○韃靼遣使入貢。○五月帝禱雨南郊。○
閏月兩畿湖廣水。○秋七月太白晝見。

帝卽位後。太白常晝見。至是御史倪敬以災異頻仍。請罷齋僧。輟遊宴。止興作。疏入。報聞。未幾。都御史蕭維禎考察黜敬爲典史。

八月謫大理寺少卿廖莊爲驛丞。杖殺御史鍾同。錮禮部郎中章綸於獄。

前年五月。同請復立沂王爲太子。帝不懌。越數日。綸亦疏言。上皇君臨天下。十有四年。天下之父也。陛下親受冊封。上皇之臣也。請於朔望令節。一詣南宮。率羣臣朝見。延安門以展友于之情。又言。宜復皇后於中宮。正天下之母儀。復舊皇儲於東宮。定天下之本。帝震怒。執綸與同並下詔獄。至是廖莊復以言沂王事。廷杖降謫。

子丙

左右言事由同倡。帝乃封巨梃。就獄中杖殺之。綸長繫。英宗復辟後。始釋綸。以爲禮部侍郎。莊亦復官。

七年春二月。皇后杭氏崩。○三月。天鼓鳴。○夏四月。彗星見。○五月。以宋儒周敦頤。程頤。朱熹。後裔。世襲五經博士。○六月。葬肅孝皇后。○兩畿山東河南饑。○秋七月。以工人蒯祥。陸祥。爲工部侍郎。

蒯祥以木工。陸祥以石工。俱累擢太僕寺少卿。至侍郎。仍督工匠。時稱爲匠官。

冬十二月。帝有疾。

卷之七

宋高宗皇帝

建炎元年

春正月

二月

三月

御撰資治通鑑綱目三編卷七

御撰資治通鑑綱目三編卷八

起丁丑明英宗天順元年凡十四年
盡庚寅明憲宗成化六年

丑丁

八年

英宗睿皇帝天順元年

春正月武清侯石亨右都御史徐有貞

等以兵迎上皇於南宮遂復位以有貞入內閣預機務下

少保兵部尚書于謙於獄

初帝不豫廷臣請立太子不報至是將南郊帝輿疾宿齋宮召石亨令攝祀事亨見帝病甚退與都督張輓張軫左都御史楊善太監曹吉祥謀立太子不如復上皇可邀功賞軾吉祥然之以告太常卿許彬彬曰此不世功也彬老矣無能爲也蓋圖之徐元玉元玉有貞字也亨卽夜至有貞家有貞大喜曰須令南城知此意軾曰已陰達之矣辛巳夜諸人復會有貞所有貞升屋步乾象亟下曰時至矣不可失時方有邊警有貞令軾以備非常爲名納兵長安門外亨掌門鑰夜四鼓啟門納之遂薄南宮城毀垣壞門入見上皇於燭下上皇問故衆俯伏請登位乃呼進輦兵士惶遽不能舉有貞等助挽以行上皇顧問諸人姓名至東華門門者拒弗納上皇

曰。朕太上皇帝也。遂入。至奉天門。陞座。時百官以帝將視朝。咸待漏闕下。忽聞南城呼譟震地。咸失色。須臾鳴鐘鼓。有貞出號於衆曰。太上皇帝復位矣。趣入賀。百官震駭入謁。上皇曰。卿等以景泰皇帝有疾。迎朕復位。其各任事如故。羣臣呼萬歲。遂命有貞以右都御史兼學士。入內閣預機務。命陳循與有貞草詔諭羣臣。日中御奉天殿卽位。于謙甫聽宣諭畢。卽班內執之。與大學士王文。太監王誠。舒良。張永。王勤。同下獄。

以許彬薛瑄爲禮部侍郎。入內閣預機務。

彬以石亨薦。瑄楊善所薦也。

改元大赦。

詔改景泰八年爲天順元年。大赦天下。論奪門功。封石亨忠國公。張軏太平侯。輓文安伯。楊善興濟伯。進徐有貞兵部尚書。予太監曹吉祥等錦衣衛世職。有貞意未慊。數請於亨曰。願得冠側注。從兄後。亨入言之。尋封武伯。

殺于謙王文籍其家。戍陳循江淵。於鐵嶺衛。斥蕭鎡商輅。

爲民。

初帝自瓦刺還。廷臣議奉迎禮。文厲聲曰。公等謂上皇果還耶。也。先不索金帛土地。而遽送駕來耶。衆素畏文。不決而罷。及易儲議起。文率先承命。至是蕭維禎定讞。坐以謀逆。處極刑。文力辨。謙笑曰。亨等意如此。辨何益。奏上。帝猶豫未忍。曰。于謙實有功。有貞曰。不殺謙。此舉爲無名。乃磔謙等。家屬戍邊。榜其罪示天下。自也。先之變。謙誓不與俱生。常留宿直廬。不還私第。景帝聞其服用過薄。詔上方製賜。及籍沒。家無餘貲。獨正室鐫鑰甚固。啟視皆賜物也。死之日。陰霾四翳。天下冤之。

二月。廢景泰帝仍爲郕王。遷之西內。

以太后制廢之。皇太后吳氏復號宣廟。賢妃削肅孝皇后杭氏位號。改稱懷獻太子爲懷獻世子。欽天監監正湯序請革除景泰年號。帝不從。

高穀罷。○以吏部侍郎李賢入內閣預機務。○郕王薨。

諡曰戾。毀所營壽陵。葬金山。與殽殤諸王公主墳相屬。妃唐氏等俱殉葬。并欲令汪妃殉。李賢言不可。乃止。

三月復立沂王見深爲皇太子。○夏四月直隸山東饑。

遣侍郎周瑄黃仕儁僉都御史林聰賑之。聰屢請發帑。帝召徐有貞李賢議。有貞曰。發帑賑濟。徒爲里書乾沒耳。賢曰。有弊勝於無賑。帝卒從賢議。時方遣使通西域。忠義前衛吏張昭上疏曰。畿輔山東。仍歲災歉。小民鬻賣子女。無有售者。轉死溝壑。卽成市鬻。望陛下用和番之費。遣使急賑。庶猶可救。報聞。

六月下徐有貞於獄。尋竄金齒。貶李賢爲叅政。

有貞爲曹石所引用。旣得志。則思自異。窺帝意厭二人。乃稍稍裁抑之。亨吉祥不能平。數毀有貞於帝。帝方寵有貞。嘗屏人與語。亨吉祥令小豎竊聽。故洩之於帝。帝驚問。輒對曰。受之有貞。帝由是疑有貞漏洩。未幾御史張鵬等欲糾亨他罪。未上。給事中王鉉以告亨。亨與吉祥泣訴於帝。謂內閣實主之。遂下諸御史獄。并逮繫有貞。及李賢。降有貞廣東叅政。賢福建叅政。旣行。有以匿名書毀斥朝政者。亨吉祥奏。此有貞怨望所爲。命追執之。下錦衣衛獄。拷掠無所得。亨吉祥恐其復用。誣以謀逆。當棄市。詔徙金齒爲民。亨敗。乃赦還。

以通政司叅議呂原入內閣預機務。○禮部侍郎薛瑄致

仕。

瑄在閣數月。見石亨等用事。歎曰。君子見幾而作。寧俟終日。遂致仕去。

以翰林院修撰岳正入內閣。預機務。

吏部尚書王翱薦之。帝亦素知正名。欲擢吏部左侍郎。兼翰林院學士。石亨張軌曰。陛下既得人。侯稱職加秩。未晚。遂命以原官入閣。

秋七月。承天門災。○許彬罷。復以李賢入內閣。

賢既貶。未行。王翱奏。賢可大用。遂復命爲吏部尚書。兼翰林學士。入閣。石亨權日重。軌賢。賢深自匿。非宣召不入。而帝益親賢。嘗問賢奪門事。賢曰。迎駕則可。奪門豈可。示後。且幸而成功。萬一機事先露。不審置陛下何地。帝悟。詔自今章奏勿用奪門字。

謫岳正爲欽州同知。尋下獄。杖戍肅州。

正負氣敢言。既入閣。益感激。思自効。會曹吉祥得匿名書。帝令撰榜格。購之。正與呂原入見。曰。爲政有體。盜賊

責兵部。奸宄責法司。豈有天子自出榜購募者。且事緩之則自露。急之則愈匿。帝是其言。遂不究。石彪鎮大同。遣使獻捷。下內閣問狀。使者言捕斬無算。不能悉致。皆梟林木間。正按地圖詰之曰。此地皆沙漠。汝梟何所。其人語塞。時吉祥亨忤甚。正請帝裁抑。帝曰。卽可以朕意告二人。正因勸吉祥辭兵柄。二人詣帝前泣請。帝內媿慰諭之。而責正漏言。正對曰。臣觀二家。必以謀叛滅。臣欲全上恩。故令早自爲計耳。二人聞益怒。承天門災。帝命正草罪已詔。因歷數弊政。無所避。亨吉祥遂搆蜚語。激帝怒。謫欽州同知。旣行。以母老留家月餘。復爲陳汝言所劾。逮繫詔獄。杖戍肅州。憲宗嗣位。始召還。復修撰。

九月以太常卿彭時入內閣預機務。

時帝方嚮用李賢。數召賢獨對。賢雅重時。退必咨之。時引義爭可否。或至失色。賢初小忤。久之心折曰。彭公真君子也。

冬十月詔爲故太監王振立祠。

帝憫念振復其官。刻香木爲振形。招魂以葬。賜祠曰旌忠。

寅戊

釋建庶人文圭。

文圭。建文帝少子也。成祖幽之中都。號爲建庶人。帝憐其無罪久繫。釋之。卽鳳陽賜室宇奴婢。月給薪米。聽婚娶。出入。文圭繫時方二歲。至是已五十七。出見牛馬。亦不能識。未幾卒。

十二月。封太監曹吉祥養子欽爲昭武伯。

二年春正月。兵部尙書陳汝言有罪下獄。

汝言附曹石。由郎中驟進尙書。陰險貪墨。邊將皆出其門。得賄無算。事覺下獄。籍其家。贓數十百萬。帝召大臣入視。曰。于謙終始景泰朝。死無餘貲。汝言官未久。何多耶。亨等俛首流汗。不能對。

上皇太后尊號。

初。岷王徽燥請上皇太后尊號。禮部以非本朝故事。乃止。已而錢溥謂陳汝言曰。復辟之初。非奉太后詔。誰敢提兵入禁。今論功行賞。無虛日。而母后徽號未加。寧非闕典。汝言以聞。帝大悅。遂上尊號。曰聖烈慈壽皇太后。

夏五月。徵江西處士吳與弼爲左諭德。不拜。

卯巳

石亨欲引賢者爲己重。謀於李賢。因薦徵與弼。授左春坊左諭德。召見文華殿。與弼辭曰。臣草莽賤士。本無高行。陛下垂聽虛聲。臣不幸有犬馬疾。今年且六十八矣。實不堪供職。帝曰。宮僚優閒。不必辭。賜文綺酒牢。遣中官送館次。謂賢曰。此老非迂濶者。務令就職。與弼三辭不允。遂稱疾篤。遣行人送歸。賜勅書銀幣。有司月給廩米。

冬十月。李賢請罷錦衣官校刺事。不許。

錦衣僉事遂果。遣校尉偵事四方。所至官吏震恐。多進聲伎貨賄以祈免。雖親藩亦然。無賄者輒被害。每逮一人。必破數大家。四方奸民詐稱校尉。乘傳縱橫無所忌。賢請撤還。帝不許。於是其勢益張。

三年春二月。遣御史及中官採珠廣東。○幸太監曹吉祥宅。○夏四月。方瑛大破貴州苗。

東苗干把豬等。攻都勻諸衛。命瑛率川湖雲貴軍。分四道擊之。所向皆捷。生擒干把豬。送京師磔之。瑛前後討川湖貴州諸苗。克寨幾二千。俘斬四萬餘。平苗之功。前此莫與比者。

庚辰

冬十月。詔霜降後錄囚。著爲令。

每歲霜降後。三法司會同公侯伯。審錄重囚。謂之朝審。

四年春正月。石亨及其從子彪伏誅。

亨弟姪家人。冒功錦衣者五十餘人。部曲親故。竄名奪門籍得官者四千餘人。兩京大臣斥逐殆盡。納私人重賄。不次遷擢。中外將帥多出其門。日燕見。參預政事。所請或不從。卽艷然見於辭色。帝不能堪。以語李賢。賢曰。惟獨斷乃可。帝因勅左順門無納總兵官。亨從子彪謀鎮大同。屬千戶楊彬等奏保。帝察其詐。下彪詔獄。籍其家。法司劾亨謀不軌。遂罷亨朝參。由亨得官者悉黜免。遂梟復奏。亨怨望。乃下獄論斬。死獄中。彪棄市。

夏四月大雨雪。○秋七月朔日食。○謫工部侍郎翁世資知衡州府。

蘇杭等府織染局歲造有定數。帝遣內使增造綵緞七千疋。世資請減之。帝怒。下錦衣衛獄。謫知府。增造坐派自此始。

巳辛

八月韃靼孛來入寇。

孛來與毛里孩等分三道自大同威遠西擁衆南行。總兵官李文不敢出。孛來直抵雁門。至代朔忻諸州。肆掠。帝遣都督顏彪率師至紫荊關。馮宗至倒馬關禦之。

五年夏五月殺弋陽王奠璽。

遂杲誣奠璽母子亂。帝遣官往勘。事已白。帝怒責杲。杲執如初。帝竟賜奠璽母子死。焚其尸。方昇尸出。大雷雨平地水數尺。人咸以爲冤。

下南雄知府劉實於獄殺之。

實居官三十餘年。廉介愛民。中官過郡。多邀索。弗與。中官折辱之。郡民大呼擁實去。中官慚忿。誣以罪。逮下詔獄。瘐死。郡民哀而祠之。

六月彗星見。○秋七月曹吉祥及其養子欽反。懷寧伯孫鏜討之。吉祥欽皆伏誅。

正統間。吉祥屢出監軍。輒選韃靼降酋善騎射者。隸帳下。師還。畜於家。石亨敗。吉祥不自安。漸蓄異謀。日犒諸酋。金錢穀帛恣所取。結爲死黨。千戶馮益。景泰間請徙上皇於沂州。復辟後。以吉祥請得不誅。因客欽所。欽問曰。古有宦官子弟爲天子者乎。益曰。君家魏武其人也。欽大喜。會言官劾欽不法事。帝命遂杲按之。降勅徧諭羣臣。欽驚曰。前降勅。遂捕石將軍。今復爾。殆矣。謀遂決。時孫鏜西征。李來。師未發。帝將以庚子昧爽臨朝。遣將欽欲於是時擁兵入。廢帝。吉祥居中應之。先夕召諸酋飲。指揮馬亮恐事敗。逸出走。告恭順侯吳瑾。瑾趨告鏜。鏜由門隙投疏入。帝卽收吉祥。勅皇城及京師諸門俱勿啟。欽知事泄。夜馳往杲家殺杲。砍傷李賢於朝房。以杲頭示賢曰。杲激我也。遂率衆攻長安門。不得入。賊往來叫呼門外。鏜急召西征軍三千人擊之。欽走攻東安門。殺吳瑾。天漸曙。其黨稍稍散。欽率數騎走突安定諸門。門盡閉。奔歸家。會大雨如注。鏜督諸軍大呼入。欽投井死。其家無大小盡誅之。帝出吉祥與欽尸同磔於市。諸從逆者皆伏誅。進孫鏜爲侯。

河決開封。

城中水深丈餘。死者不可勝計。

午壬

韃靼寇河西。遣都督馮宗禦之。

孫鏜等既不行。邊報益急。因命宗充總兵官禦之。起副都御史王竑於家。與兵部侍郎白圭。叅贊軍務。八月。亭來上書乞和。而寇掠如故。

九月。京師地震。有聲。○冬十一月朔。日食。

六年。夏五月。都督僉事顏彪破兩廣獠。

自元年春。大藤峽獠爲亂。兩廣苗獠蠭起。廣西殘燬殆遍。前年。帝命彪爲總兵官討之。彪會兩廣兵。攻破七百餘寨。駐軍大藤峽。進擊龍山。直抵潯梧。所向皆捷。

秋九月。皇太后孫氏崩。○廣錦衣衛獄。

遂杲死。指揮同知門達。益布旗校於四方。告許者日盛。尋以囚多。獄舍不能容。請城西武庫隙地增置之。及達敗。始毀去。

冬十一月。葬孝恭皇后。○呂原卒。

未癸

七年春二月。以陳文爲禮部侍郎。入內閣預機務。○夏四月。殺巡按御史李蕃。

蕃巡按宣大。錦衣衛偵事者言其擅撻軍職。逮治之。又遼東巡按御史楊璉。山西巡按御史韓祺。並以中官誣奏。相次被逮。蕃與祺並荷校死。

五月朔日食。○秋閏七月。復宣宗廢后胡氏位號。

孫太后崩。錢皇后爲帝言。胡后賢而見廢。其歿也。人畏孫太后殮葬不如禮。因勸復其位號。帝問李賢。賢對曰。陛下此心。天地鬼神實臨之。臣以陵寢享殿神主。俱宜如奉先殿式。帝從之。

冬十一月。下指揮同知袁彬於獄。尋釋之。

帝在迤北。彬周旋左右。未嘗違忤。夜則與帝同寢。天寒以脅溫帝足。彬嘗中寒。帝身壓其背。汗浹乃已。一年之內。視彬如骨肉。帝復位。擢指揮僉事。進同知。時門達掌衛事。彬恃舊恩不爲下。達誣以罪。逮治之。調南京錦衣衛。

申甲

八年春正月帝崩遺詔罷宮嬪殉葬。

初太祖崩宮人多從死者歷成祖仁宣二宗皆用殉多者至數十人景帝以邸王薨猶用其制至是帝遺詔罷之。

太子見深卽位。○侍讀學士錢溥以罪貶官。

溥嘗授內使書東宮內侍王綸從受學英宗疾篤綸私詣溥計事陳文與溥比舍居密覘之已而英宗崩李賢當草詔文起奪其筆曰無庸已有草者因言溥綸定計欲以溥代賢而以兵部侍郎韓雍代尚書馬昂賢怒發其事會大斂時綸衰服襲貂帝惡之因數綸罪執下獄詞所連者十餘人謫溥順德知縣降雍爲浙江叅政。

二月指揮僉事門達有罪下獄戍之。

達亦以結納王綸調貴州都勻衛甫行言官交章論其罪逮繫論斬後貸死謫戍廣西南丹衛。

始命中官傳旨授官。

帝命中官傳旨用工人爲文思院副使自後相繼不絕一傳旨姓名至百十人謂之傳奉官文武僧道濫恩者

以千數。

三月尊皇后爲慈懿皇太后。貴妃周氏爲皇太后。

帝命議上兩宮尊號。中官夏時欲獨尊貴妃爲太后。李賢彭時持不可。頃之中官傳貴妃旨。子爲皇帝。母當爲皇太后。豈有無子而稱太后者。宣德間有故事。彭時曰。今日事與宣德異。胡后上表讓位。故正統初不加尊。今名分固在。安得爲比。中官厲聲曰。如是。何不草讓表。時曰。先帝神靈在上。敢有二心。且錢皇后無子。何所規利。而爲之爭。不忍默者。欲全主上聖德爾。若推大孝之心。則兩宮並尊爲宜。賢亦極言之。議遂定。將上冊寶。彭時曰。兩宮同稱。則無別。錢皇后請加二字。以便稱謂。從之。越數日。中官覃包至內閣曰。上意固如是。但迫於太后。不敢自主。非二公力爭。幾誤大事。陳文初默無一語。聞包言。大愧。

放宮人。

時日黯無光。李賢偕同官上言。日者君象。君德明。則日光盛。惟陛下敬以修身。正以御下。剛以斷事。明以察微。持之不懈。則天變自弭。又言天時未和。由陰氣太盛。自宣德至天順間。選宮人太多。浣衣局沒官婦女。愁怨尤

甚。皆宜放還。帝從之。中外大悅。

夏四月朔。日食不見。○五月。葬裕陵。○秋七月。立皇后吳氏。八月。廢之。冬十月。立妃王氏爲皇后。

帝居東宮時。萬貴妃已擅寵。后既立。摘其過杖之。帝怒。廢居別宮。貴妃寵冠後宮。王后處之澹如也。以是得安。致仕禮部侍郎薛瑄卒。

年七十二。諡文清。瑄初受學於高密魏希文。海寧范汝舟。聞濂洛之傳。其學以復性爲主。嘗言自考亭以還。斯道大明。無煩著作。直須躬行耳。有讀書錄二十卷。皆自言所得。學者宗之。

始置皇莊。

以沒入曹吉祥地爲宮中莊田。皇莊之名自此始。給事中齊莊言。天子以四海爲家。何必與民爭利。弗聽。自是戚畹及中貴家。多奪民地爲莊田矣。

立武舉法。

酉乙

直省舉諸武藝人。兵部同總兵官。考其策略弓馬。分別甲乙。武學廢已久。至是復立之。指揮以下子弟。皆令入學。

憲宗純皇帝成化元年春正月。遣都督趙輔。僉都御史韓雍。討廣西猺。

守臣奏猺賊殘毀廣東。又越湖廣江右。日益蔓延。乞選將征討。兵部尚書王竑亦言。賊非大創不止。薦雍統兵。乃命輔為征夷將軍。召雍為僉都御史。贊理軍務。

開納粟例。

以備兩廣軍餉。

二月。詔雪于謙冤。

御史趙敬言。于謙等為石亨輩誣陷。榜示天下。竊思正統十四年。虜犯京城。賴謙一人保守。其功甚鉅。乞收回前榜。死者卹贈。生者錄用。帝曰。朕在東宮時。即聞謙冤。謙有社稷之功。而受無辜之慘。所司其急如敵言施行。

釋謙子冕還家。明年八月。復寬官。遣行人往祭謙墓。

帝耕藉田。○彗星見。○三月。帝視國子監。○荆襄盜起。

荆襄上游爲鄖陽。古麋國。地多山。元至正間。流賊爲亂。終元之世。不能制。明初以兵勦除。空其地。禁流民不得入。然地界秦豫楚之間。又多曠土。山谷阨塞。林箐蒙昧。中有草木。可採掘食。正統二年。歲饑。民徙入。不可禁。其中巧黠者。稍稍相雄長。漢中守臣請誅之。英宗曰。小民爲饑寒迫耳。奈何。卽用兵。命御史往撫。謫戍數人。餘陽聽撫。而大奸潛伏不出。尋復縱三省長吏。又多誘非已境。因循不治。至是。劉通。石龍。劉長子。聚衆數萬。掠襄鄧境。指揮陳昇等二十四人死焉。明年。命朱永。白圭討之。連敗賊。偵知賊巢在萬山。豆沙河。諸軍分道進。擒通於後巖。石龍。劉長子逸去。轉掠四川。燬巫山大昌。圭又破之。漢中賊被圍。食盡。劉長子縛石龍以降。賊少熄。

夏五月。四川盜趙鐸作亂。官軍擊斬之。○六月。奪張瑾楊

宗襲爵。

瑾父太平侯軌。宗父興濟伯善。俱以奪門功封。時以迎復襲爵者皆革奪。惟瑾宗尙襲封。指揮同知董源等援

例乞復。遂并革瑾宗。

秋八月。兩畿湖廣浙江河南饑。

給事中袁芳等上言。比來救荒無術。老弱轉死。丁壯流移。南陽荆襄。流民十餘萬。兩京浙豫。或水或旱。禾麥絕收。乞勅官司賑濟。於是命王恕及浙豫撫按。各賑其屬。旋遣工部侍郎沈義往保定。僉都御史吳琛往淮陽。內外諸臣。請緩征鹽鈔逋賦等。皆從之。義琛無他策。惟條上納粟事例。既而皆以不恤民瘼斥罷。

冬十一月。韃靼毛里孩寇延綏。

虜衆甚盛。詔大同總兵楊信。寧夏總兵李杲。陝西巡撫項忠等。率所部兵禦之。初。韃靼入寇。或在遼東。宣府。大同。或在寧夏。莊浪。甘肅。去來無常。爲患不久。景泰初。始犯延慶。然部落少。不敢深入。天順間。有阿羅出者。率屬潛居河套。遂逼近西邊。河套。古朔方地。唐張仁愿築三受降城處也。地在黃河南。自寧夏至偏頭關。延袤二千里。饒水草。外爲東勝衛。東勝而外。土地平衍。敵來不能隱。明初守之。後以曠絕內徙。至是。孛來與小王子毛里孩等。先後繼至。擄中國人爲鄉導。抄掠延綏。無虛時矣。

韓雍破獠於大藤峽。

初國子監生封登奏潯州夾江諸山險峻中有大藤如斗延亘兩崖勢如徒杠蠻衆蟻度號大藤峽登峽巔數百里顧盼可盡諸蠻倚爲奧區景泰以來獠獍嘯聚爲亂乞調兵勦滅報聞及朝議用兵編修邱濬上書李賢言賊在廣東者宜驅在廣西者宜困賢善之獻於朝詔錄示諸將諸將多主其說欲分兵兩廣韓雍曰不然賊已蔓延數千里而所至與戰是自敗也大藤峽賊之巢穴我以全師搗之心腹旣潰餘迎刃解耳乃倍道進長驅至峽口攻破山南諸巢追躡至九層崖等山用斧斷藤改名斷藤峽明年四月餘黨攻陷洛容入博白城侵掠全州臨桂諸境再破之奏賊平召輔還封武靖伯雍進副都御史留兩廣提督軍務封

二年春三月遣右都督李震討靖州苗破之。

湖廣靖州銅鼓五開武崗等苗爲患巡撫王儉不能討乃以命震震督諸軍由銅鼓天柱諸境分道入破八百餘寨又大破獠獍於桂陽威名蓋西南苗獠畏懾呼爲金牌李。

南畿大饑。夏五月李賢以父喪起復。貶修撰羅倫爲福

建市舶提舉。

賢喪父。令馳驛歸葬。卽還視事。賢再疏乞終制。不許。及還京。修撰羅倫詣賢沮之。不聽。倫上疏諫。忤旨。黜爲福建市舶副提舉。王翱以文彥博救唐介事。諷賢。賢曰。潞公市恩。歸怨朝廷。吾不可以效之。後因商輅請。乃召倫還。

秋七月。番寇洮州。○冬十二月。少保華蓋殿大學士李賢卒。

贈太師。諡文達。賢每遇災變。必與同官極陳無隱。常言內帑餘財。不以恤荒濟軍。則人主必生侈心。而用之於土木。禱祠聲色。以故頻請賑貸。恤邊所薦引年富。軒輓耿九疇。王竑。李秉。程信。姚夔等。皆爲名臣。

以太常寺少卿劉定之入內閣預機務。○鎮守開原太監韋朗有罪。赦不問。

時內侍梁芳。韋興。誂事萬貴妃。日進美珠珍寶。錢能。韋眷。王敬。鄭忠等。爭假採辦名。先後出監大鎮。皆縱恣。帝

亥丁

以妃故不問也。時朗坐失律。當逮治。其同官鎮守太監李良上言。昔武侯失律街亭。韓琦喪師西夏。兵家之常。未嘗以一眚遽棄。朗請戴罪立功。兵部議勿許。內批允之。

三年春二月朔日食。○御經筵。○三月召商輅復入內閣。

○夏四月地震。

自去年六月至於是月。四川地三百七十五震。諭所在官吏修省。

雷震南京午門。詔羣臣修省。

言官劾罷戶部尚書張睿。南京禮部侍郎俞綱等。於是陳文彭。時商輅。劉定之。姚夔。並乞免。上皆慰留。

秋八月增江西督賦官。

巡按御史趙啟言。江西賦繁官少。催征不力。逋負者多。請增設司府佐貳官。俾專督理。乃增布政使參政一。南昌吉安撫袁臨江饒瑞七府同知各一。

冬十二月杖謫翰林院編修章懋。黃仲昭檢討莊景。

以明年上元張燈。命詞臣撰詩詞進奉。懋仲昭、臬同疏言。今川廣未靖。遼左多虞。三楚豫章。赤地千里。正陛下宵旰焦勞之日。不宜更耽宴樂。至翰林以論思爲職。宣宗皇帝御製翰林箴曰。啟沃之言。惟義與仁。堯舜之道。鄒魯以陳。張燈豈堯舜之道。詩詞非仁義之言。乞停止烟火。移此視聽。以明日達聰。省此資財。以賑饑恤困。則災祲可銷。太平可致。帝以元夕張燈。祖宗故事。責懋等妄言。杖之。謫懋仲昭知縣。臬通判。時以懋等與羅倫同稱翰林四諫。

四年春三月。禁勲戚請民田。夏四月。慶雲伯周壽求涿州田。許之。

先是番僧劄實巴。乞靜海地爲常住田。嘉善公主求文安地數百頃。德王請壽張地四千一百餘頃。皆予之。給事中邱弘等言。洪武永樂間。以畿輔山東土曠人稀。聽民開墾。永不科稅。邇者權豪怙勢。率指爲閒田。奏乞至數十百頃。夫地踰百頃。古者百家恒產也。豈可徇一人之私。而奪百家恒產哉。帝然之。詔自今請乞皆不許。劄實巴等所乞。還之於民。未幾。壽以太后弟冒禁求涿州田六十餘頃。帝不得已。許之。自是翊聖夫人劉氏求通

州武清地三百餘頃。太后弟周或求武强武邑地六百餘頃。皆予之。給事中李森疏諫。不省。

加番僧封號。

西僧割巴堅參。以秘密教得幸。封萬行莊嚴。功德最勝。智慧圓明。能仁感應。顯國光教。弘妙大悟法王。西天至善。金剛普濟大智慧佛。其徒封國師。錫誥命者。不可勝計。服食器用。僭擬王者。出入乘轎輿。衛卒執金吾仗前導。其他羽流加號真人高士者。亦盈都下。而佞倖由茲進矣。

陳文卒。

文素負才望。及奪情居宮端。行事鄙猥。既參大政。無所建明。子弟家人。大通賄賂。羅倫論李賢奪情。文內媿。陰助賢逐倫。益爲時論所鄙。

慈懿皇太后錢氏崩。秋八月。葬孝莊皇后。

初營裕陵。李賢請營三壙。中旨不可。事遂寢。至是周太后不欲合葬。帝召大臣議。彭時曰。合葬裕陵。主附廟。定禮也。翼日又問。時對如前。帝曰。朕豈不知。慮他日妨母后耳。時與商輅劉定之。合辭言曰。皇上大孝。當以先帝

心爲心。今若安厝於左。而虛右以待將來。則兩全其美矣。帝頷之。是夕時等復疏言。漢文帝尊生母薄太后。而呂后仍葬長陵。宋仁宗追尊生母李宸妃。而章獻劉后仍祔太廟。今若陵廟之制未合。則有乖前美。貽譏來葉。下禮官及羣臣集議。皆請如時言。帝曰。乖禮非孝。違親亦非孝。其議別卜。明日。廷臣百四十七人。並上疏諫。又明日。夔合諸大臣疏言。天下者。祖宗之天下。皇上當守祖宗成法。豈可阿順母后。顯違前典。帝猶豫未決。給事中毛弘倡言。此大事。吾輩當以死爭。合羣臣伏哭文華門外。帝命退。衆叩頭曰。不得旨。不敢退。自己至申。帝與太后皆感動。乃許之。羣臣呼萬歲出。

石城酋滿俊反。遣都督劉玉。副都御史項忠討平之。

滿俊亦名滿四。其祖巴丹。明初率所部來降。世以千戶畜牧爲雄長。仍其故俗。無科徭。地在開城縣固原里。俊素獷悍。藏匿奸盜。會有獄辭連俊。有司跡捕至其家。多要索。遂激衆爲亂。據石城。石城。卽唐吐番石堡城。最險固。官軍討之。爲所敗。不數月。衆至數萬。關中震動。乃以玉爲平虜副將軍。忠總督軍務。討之。旣抵石城。天寒甚。士卒頗困。忠慮賊乘凍渡河。與套寇合。日夜治攻具。身當矢石。遂禽俊。送京師。伏誅。

丑巳

五年夏五月以禮部侍郎萬安入內閣預機務。

安由編修累遷禮部左侍郎外寬而深中同年生詹事李泰中官永昌養子也齒少於安安兄事之得其歡泰每當遷必推安出已上至是議簡閣臣復推安曰子先之我不患不至故安得入閣而泰忽暴病死安無學術既柄用惟日事請托結諸閹爲內援時萬貴妃寵冠後宮安因內使致殷勤自稱子姪行妃嘗自愧無門閥聞則大喜妃弟錦衣指揮通遂以族屬數過安家兩家婦日往來通妻著籍禁中恣出入安得備知宮中動靜益自固。

六月朔日食。○秋八月禮部侍郎劉定之卒。○御經筵。○下刑部郎中彭韶監察御史季琮於獄。

太后弟周彧奏乞武強武邑民田不及賦額者籍爲閒田帝遣官按視皆民所墾闢輸賦者因據籍步之每畝百步餘沒入爲閒田得七十餘頃彧不滿復言於帝改命韶琮覆視韶往不復步田周視徑歸上疏自劾曰真定田自祖宗時許民墾種卽爲恒產除租賦以勸力農功臣戚里家與國咸休豈當與民爭尺寸地臣誠不忍

庚寅

奪小民衣食。附益貴戚。請伏奉使無狀罪。帝怒。下詔琮詔獄。言官爭論救。乃釋。

冬十一月起復韓雍總督兩廣。

先是韓雍以憂去。賊復熾。僉事陶魯言。兩廣地勢錯互。當如臂指相使。不可離析。近賊入廣西。臣與廣東三司議調兵。匝月未決。以是賊得大肆劫掠。乞仍命大臣一人總之。庶事權一而責有所歸。乃命雍為總督。開府梧州。

六年春二月遣使分巡州郡。

兵部尚書白圭等言。陝西屢遭寇掠。川廣盜攘未息。疫癘行於閩越。災異見於淮南。兩畿齊豫雨雪愆期。二麥槁死。荆襄流民動數十萬。姦盜由之。乞簡大臣循行天下。便宜興革。於是遣大理寺少卿宋旻。侍郎曾翬。原傑。黃琮。副都御史滕昭。巡視畿南。浙江。河南。四川。福建。奏斥貪殘吏甚衆。

夏四月旱。

北畿。山東。河南。大旱。陝西。四川。山西。兩廣。雲南。並饑。

六月朔。日食。○大水。

順天。河間。永平。諸郡大水。水旱相仍。民食草木幾盡。從吏部尚書姚夔請遣使賑卹。

秋七月。皇子生於西內。

皇子。卽孝宗母紀氏。賀縣人。本土官女。征蠻俘入掖庭。警敏通文字。命守內藏。時萬貴妃專寵而妬。後宮有娠者皆墮之。帝偶行內藏。妃應對稱旨。悅幸之。遂有娠。萬貴妃知而恚甚。令婢鈎治之。婢謬報曰。病瘡。乃謫居安樂堂。久之。皇子生。使門監張敏溺焉。敏驚曰。上未有子。奈何棄之。稍哺粉餌飴蜜。藏之他室。貴妃日伺無所得。

御撰資治通鑑綱目三編卷八

卯辛

御撰資治通鑑綱目三編卷九

起辛卯明憲宗成化七年盡丁未明憲宗成化二十三年 凡十七年

七年春正月以余子俊巡撫延綏

時虜數入邊兵部尚書白圭請罷延綏巡撫王銳推陝西布政余子俊代之先是延綏鎮綏德州屬縣米脂吳堡孤懸鎮外寇以輕騎入掠鎮兵覺而追之輒不及往往得利去子俊既至乃徙鎮榆林增益兵衛攻守器畢具榆林遂爲重鎮虜患漸稀軍民得安耕牧

始立漕粟長運法

初運漕京師軍民互相轉運民運淮徐臨清德州四倉軍接運入京通二倉曰支運宣德間平江伯陳瑄請令民運至淮安瓜州兌交運軍給其路用耗米是爲兌運至是應天巡撫滕昭變爲長運法令運軍徑赴江南水次交兌曰改兌復加渡江米一斗後數年命淮徐臨德四倉之米悉改水次交兌而官軍長運遂爲定制

二月增設九江蘓杭鈔關○御經筵○冬十月命刑部侍

郎王恕總督河道。

英宗初。命官督漕。分濟寧南北爲二。侍郎鄭辰治其南。副都御史賈諒治其北。至是。河道淤塞。廷議分漕河沛縣以南。德州以北。及山東爲三道。各委曹郎及監司專理。且請簡風力大臣一人總理其事。於是始命恕爲總河。

十一月。立子祐極爲皇太子。○十二月。彗星見於紫微。

光長竟天。正晝猶見。明年正月。乃滅。帝避正殿。撤樂。勅羣臣條時政。

見閣臣於文華殿。

彗星久見。廷臣多言君臣否隔。宜時召大臣議政。大學士彭時商輅力請。中官約以御殿日召對。且曰。初見時。情未洽。勿多言。姑俟他日。將入。復約如初。比見。時言天變可畏。帝曰。已知。卿等宜盡心。時又言。昨御史有疏。請減京官俸薪。武臣不免缺望。乞如舊便。帝可之。萬安遂頓首呼萬歲。欲出。時不得已。皆叩頭退。中官戲朝臣曰。若輩嘗言不見召。及見。止知呼萬歲耳。一時傳笑。謂之萬歲閣老。帝自是不復召見大臣。其後尹直入閣。欲請

壬辰

見計事安止之曰。君不聞彭公耶。請召對。一語不合。輒叩頭呼萬歲。今吾輩每事盡言。太監擇而聞之。上無不對多矣。

八年春正月。太子祐極卒。

萬貴妃害之也。

二月。預徵山西河南陝西明年賦。

以謀搜套也。於是內地騷然。兵科給事中梁璟言。山西預徵草豆。每夫科銀或至二十兩。歲旱民饑。逃亡載路。太原一縣。五日內已有三百八十餘家。人心駭懼。乞發帑補買。以甦民困。事下戶部議。格不行。

夏四月旱。○五月。占城遣使告難。

前年安南國王黎灝。攻破占城。擄其王盤羅茶全。至是使臣樂沙來告急。命給事中陳俊等賫詔往。而占城已為黎灝所據。不克入。

秋。南畿浙江大水。

已癸

御覽卷之三綱卷之

九年春正月土魯番據哈密。

初哈密忠順王卜列革卒無子。王母主國事。成化二年。以把塔木兒爲都督。攝王。又卒。其子罕慎請襲都督。帝許之。而不命其主國事。政令無所出。時土魯番酋阿力。自稱速檀。乘機襲破哈密城。擄王母及金印去。留其妹婿牙蘭鎮之。兵部言。哈密實西域咽喉。棄而不救。恐赤斤蒙古苦峪沙州等。亦爲所脅。則我之藩籬盡撤。而甘肅之患方殷。使套寇不退。關中供億愈難矣。乃遣都督同知李文。右通政劉文。往甘肅經略。文等檄罕慎。及赤斤罕東。也克力。諸部。集兵進討。

三月畿南山東大饑民相食。

山東境內忽黑暗如夜。又大饑。餓殍無餘。乃命免今年租。

夏四月朔日食。○閱武臣騎射。

帝以武備廢弛。乃御西苑。命將官騎射。黜指揮李勝等四十六人。十一月重閱西苑。罷定襄伯郭嵩等四人。

秋九月鎮守浙江太監李義殺指揮馬璋不問。

義至寧波。指揮馬璋。饋白金二十兩。意不嫌。遂杖殺之。璋母訟於朝。上命義自陳。言因公事杖璋。璋病死。非斃杖也。帝命宥之。

滿都魯孛羅忽。札加思蘭。並入寇。王越擊破其孛於紅鹽池。

成化初。毛里孩。札加思蘭。孛羅忽。滿都魯。相繼寇邊。六年後。歲常三四入。殺掠諸郡人畜。輒數百萬。邊將擁兵坐視。或俟其出而尾之。獲所遺老弱。輒虛張首級。冒陞賞。有敗衄者。罪止降調。且多宥之。嘗三命大將朱永。趙輔。劉聚。出征。每以地濶事大爲解。不敢出邊。虜患由是日熾。至是三酋大舉深入。直抵秦州。安定。諸邑總督延綏軍務王越。策寇盡銳西出。而不備東偏。乃率總兵官許寧。遊擊將軍周玉。各將兵四千六百人。從榆林紅兒山出境。晝夜兼行。涉白鹽灘北。又百餘里。探知賊老弱俱在紅鹽池。乃分兵爲十覆。而身率寧玉張兩翼直薄其營。伏兵又從後夾擊。大破之。焚其廬帳而還。及寇飽掠歸。則妻子畜產已蕩盡。相對痛哭。自是遠徙北去。不復居河套。間盜邊不敢大入。亦數遣使通貢。西陲得息肩者數年。

午甲

十年春正月。命王越總制三邊。

刑部主事張鼎言。延綏甘肅寧夏三邊。鎮撫不相統一。宜推文武重臣一人總制。因設制府於固原。詔以越爲之。巡撫總兵而下。並聽節制。三邊設總制自此始。

三月。罷總督兩廣右都御史韓雍。

雍在粵。於鎮守中官黃沁不爲禮。又自奉尊嚴。三司皆長跪白事。布政何宜。副使張敷。皆銜之。會柳濤諸蠻陷懷集。兵部劾雍失機。沁亦訐雍濫賞費財。帝遣官往勘。宜敷因釀成其罪。命致仕去。雍用兵兩粵。躬親矢石。軍門設銅鼓數十。裨將以下。繩柙無所假。蠻民畏懾。寇盜寢稀。粵人念雍功。爲立廟祀。

夏閏四月。築邊牆。

初。余子俊上言。三邊惟延慶地平易。寇屢入犯。邊人導入河套。自是寇顧居內。我反屯外。急宜於沿邊築牆置堡。況今舊界石所在。多高山陡崖。依山形。隨地勢。以成邊牆。於事爲便。時尚書白圭。以陝民方困。奏緩其役。八年秋。子俊復言曰。今征套土馬。屯延綏者八萬。芻茭煩內地。若今冬寇不北去。又須備來年軍資。約八百二十

未乙

五萬。公私煩擾至此。安得不變計。請於明年春夏。寇馬疲乏時。役陝西運糧民夫。給食興工。期兩年畢事。帝從之。會王越襲虜紅鹽池。患少息。子俊得一意興役。東起清水營。西抵花馬池。延袤千七百七十里。凡築城堡十一。邊墩十五。小墩七十八。崖砦八百十九。役軍四萬人。不三月而成。墻內地悉分屯墾。歲得糧六萬餘石。

秋九月朔日食。○冬十月移哈密衛於苦峪。

李文等引兵至卜隆吉兒川。諜報阿力集衆抗拒。文等不敢進。令罕東赤斤二衛還守本土。罕慎及乜克力退居苦峪。文等亦引還肅州。十三年冬。令邊臣築苦峪城。給米布。賜穀種。俾罕慎暫理人民於其地。

十二月罷採金。

時內費日侈。帑金不足用。命湖廣寶慶等郡開採。歲役五十五萬人。死者無算。僅得金三十餘兩。乃從撫臣言已之。

以項忠爲兵部尚書。

十一年春三月。少保文淵閣大學士彭時卒。

贈太師諡文憲時立朝三十年持正存大體有所論薦不使人知燕居無惰容非其義不取有古大臣風

以吏部左侍郎劉翊禮部右侍郎劉吉入內閣預機務

翊先以舊宮僚晉官直經筵日講劉定之稱爲講官第一帝亦愛重之入閣後每呼東劉先生翊性疎直吉則多智數與萬安比

乾清宮門災○五月始召見皇子於西內

帝自悼恭太子薨常鬱鬱不樂一日召太監張敏櫛髮照鏡嘆曰老將至而無子敏伏地曰萬歲已有子也帝愕然曰安在敏叩頭對曰奴言即死萬歲當爲皇子主於是太監懷恩頓首曰敏言是皇子潛養西內今已六歲匿不敢聞耳帝大喜即日幸西內遣使迎皇子紀妃抱皇子泣曰兒去吾不得生兒見黃袍有鬚者即兒父也衣以小緋袍乘小輿擁至階下髮披地走投帝懷帝置之膝撫視良久悲喜泣下曰我子也類我使懷恩赴內閣具道其事羣臣皆大喜懷恩并傳帝意欲宣示外廷商輅曰當降勅禮部以定名爲辭於是廷臣相率稱賀帝即命皇子出見廷臣越數日帝復召閣臣問曰皇子既出將何以處之輅頓首曰陛下踐阼十年儲副未

立。天下引領望久矣。當卽立爲皇太子。安中外心。帝領之。遂定名祐檣。頒詔中外。

六月。皇子母紀氏暴卒。○秋八月。浚通惠河。

通惠河者。卽大通河。元郭守敬所鑿。由大通橋東下。接通州。與白河合。又會衛河入海。十里一閘。蓄水濟運。亦名潞河。洪武中廢。永樂中修治復湮。前五年。尚書楊鼎。上言舊閘二十四。通水行舟。但元時水在宮牆外。舟得入城。今水由皇城金水河出。故道不可復行。請濬玉泉龍泉。及月兒柳沙諸泉水。使入西湖。閉分水青龍閘。引諸水從高梁河。分其半由金水河出。餘從都城外濠流轉。會正陽門。併流大通橋閘河。隨旱澇啓閉。則糧艘可近倉。甚便。帝善其議。工未及舉。至是。命平江伯陳銳等。督漕卒疏浚。明年六月。訖工。濬泉三。增閘四。漕舟稍通。滿都魯。乷加思蘭遣使入朝。○九月朔。日食。○冬十一月。立子祐檣爲皇太子。

時孝肅皇太后居仁壽宮。語帝曰。以兒付我。太子遂居仁壽。一日。貴妃召太子食。太后謂曰。兒去無食也。太子至。貴妃治食。曰。已飯。進羹。曰。疑有毒。貴妃曰。是兒數歲卽如是。他日魚肉我矣。因恚成疾。

以朱英總督兩廣軍務。

自韓雍以來將帥喜邀功利俘掠名爲鵬勦英至鎮以寧靜招撫猺獞效順者定編戶給復三年於是馬平陽朔蒼梧諸縣蠻悉望風附而荔波賊李公主有衆數萬久負固亦遣子納款爲置永安州處之俾其子孫世吏目自是歸附日衆凡爲戶四萬三千有奇口十五萬有奇帝甚嘉之。

十二月改諡郕戾王爲景皇帝。

初荆門州訓導高瑤上言正統己巳之變先帝北狩宗社危如一髮使非郕王繼統國有長君則禍亂何由平鑾輿何由返六七年間海宇寧謐厥功不小迨先帝復辟貪天功者遂加厚誣使不得正其終節惠躋祀未稱典禮望追加廟號以盡親親之恩章下廷議久不決左庶子黎淳言昌邑旣廢不聞復爲漢某帝更始旣廢不聞復爲漢某王瑤此言有死罪二一誣先帝爲不明一陷陛下於不孝此必有小人主之者不然彼草茅疎遠安敢妄言帝曰景泰往事朕未嘗介意淳欲獻媚希恩耶切責之議亦遂寢其後御史楊守隨亦言郕王有功社稷請改諡帝下廷議大學士輅極言當復至是乃下詔曰朕叔郕王踐阼戡亂保邦奸臣讒構請去帝號先

申丙

帝尋知枉誣。深懷悔恨。以次折奸於法。不幸上賓。未及舉正。朕敦念親親。用成先志。郕王可仍舊皇帝號。尋上尊諡曰恭仁康定景皇帝。令所司修飾陵寢。

十二年春二月朔日食。夏五月。命副都御史原傑撫治

荆襄流民。

初白圭旣平劉通。荆襄流民屯結如故。寇掠南漳。內鄉。渭南。帝命項忠討之。忠遣人入山招諭。流民先後來歸者九十萬。通餘黨亦以次就禽。至是流民復聚。朝廷以爲憂。祭酒周洪謨上言。東晉時。廬松之民流至荊州。乃僑置松滋縣於荊南。陝西雍州之民流聚襄陽。乃僑置南雍州於襄西。其後松滋遂隸荊州。南雍遂隸襄陽。今當增置郡縣。聽附籍爲編氓。可實襄鄧戶口。都御史李賓善其說。聞於帝。帝然之。遂命傑出撫。傑徧歷山溪。宣朝廷德意。諸流民欣然附籍。於是大會湖廣河南陝西撫按官籍之。得戶十一萬三千有奇。口四十三萬八千有奇。其初至無產。及頑梗不率者。驅還其鄉。附籍者用輕則定田賦。民大悅。因相地勢。以襄陽所轄鄖縣。去府治遠。山林深阻。猝有盜賊。難遙制。乃拓其城。置府曰鄖陽。設湖廣行都司。薦御史吳道宏自代。詔卽擢道宏大

理寺少卿撫治鄖陽襄陽荊州南陽西安漢中六府鄖陽有撫治自此始傑以功進右都御史踰年卒部民爲立祠。

秋七月黑眚見。

有物金睛修尾狀如犬狸負黑氣夜入民家至則人昏迷徧城驚擾帝常朝奉天門侍衛見之而譁頃之乃定帝於禁中祭告天地以四事自責。

九月令太監汪直刺事。

妖人李子龍以符術給太監韋寒舍私入大內事發伏誅帝心惡之銳欲知外事太監汪直故大藤峽猺種給事萬貴妃昭德宮遷御馬監爲人便黠帝因令易服將校尉一二人密出伺察人莫知也獨都御史王越與結歡。

冬十月京師地震。十一月南京大雷雨。

十三年春正月置西廠以太監汪直領之。

初成祖置東廠。令宦官訪緝逆謀大奸。與錦衣衛均權勢。至是尚銘領東廠。又別設西廠刺事。以汪直督之。所領緹騎倍東廠。勢遠出衛上。時南京鎮監軍力明進貢。還以百艘載私鹽。武城典史詰之。力明擊折其齒。射殺一人。直廉得以聞。帝謂直能摘奸。益幸直。直乃任錦衣百戶韋瑛爲心腹。屢興大獄。冤死者相屬。自諸王府邊鎮及南北河道所在。校尉羅列。民間鬪詈。鷄狗瑣事。輒置重法。人情大擾。是年夏。大學士商輅率同官上言。陛下委聽斷於直。直又寄耳目於群小。擅作威福。賊虐善良。陛下若謂摘奸禁亂爲有益。則前此數年。何以帖然無事。且曹欽之變。由遂杲刺事激成。可爲明鑒。自直用事。卿大夫不安其職。商賈不安於途。庶民不安於業。若不亟正。天下安危未可知也。帝得疏。愠曰。用一內豎。何遽危天下。誰主此奏者。命太監懷恩覃昌至閣詰責。輅正色曰。朝臣無大小。有罪皆請旨逮問。直擅抄沒三品以上京官。大同宣府邊城要害。守備俄頃不可缺。直一日械數人。南京祖宗根本地。直擅收捕留守大臣。諸近侍在帝左右。直輒易置。直不去。天下安得無危。輅等同心一意。爲朝廷除害。無有先後。兵部尚書項忠亦倡九卿劾之。帝不得已。令直歸。御馬監調韋瑛邊衛散諸旗校還錦衣。中外大悅。然帝眷直不衰。仍令密出外刺事。御史戴縉者。性險躁干進。探知帝意。乃假災異建言。頌

直功德遂詔復開西廠。

夏六月。斥兵部尚書項忠爲民。謹身殿大學士商輅引疾歸。

初忠倡九卿劾直。旣爲奏。令郎中姚璧持詣諸尚書署名。先詣吏部。尹旻却曰。奏出項尚書。兵部宜爲首。璧對曰。公六卿之長也。旻怒曰。今日乃知六卿長耶。旻署名。卽遣報直。直啣之。構忠下獄。斥爲民。直又譖輅納指揮楊驍金。輅乞罷。聽歸。戴縉乞令兩京大臣自陳。欲以傾直。所不悅者。於是大臣以次陳免者數十人。士大夫益俛首事直矣。

秋八月。錦衣衛執工部尚書張文質下獄。

東廠官校發雲南百戶左昇私事。詞連掌通政使工部尚書張文質。錦衣衛遂執下獄。帝不知也。左通政何琮等以掌印請。帝乃知而釋之。

九月。京師地震。

戊戌

十四年春二月皇太子出閣就學。

有老奄覃吉者朝夕侍太子口授四書章句及古今政典帝賜太子莊田勸勿受曰天下皆太子有也太子偶從內侍讀佛經吉入急手孝經端本正始吉有力焉。

夏六月太白歲星同晝見。汪直行遼東邊。

前年冬遼東巡撫陳鉞以掩殺冒功激變命馬文升往安撫垂定直欲攘其功請於帝挾王英日馳數百里。箠守令各邊都御史服橐鞬迎謁供張百里外至遼東。陳鉞郊迎蒲伏廚傳尤盛左右皆有賄直大悅馬文升不爲禮直再下令招撫文升乃推功與直。然直內慚心益不喜日夜思有以中之。

秋九月河決開封。

遷榮澤縣城於河北以避水患。

十五年春正月修開國功臣墓。夏四月以方士李孜省爲太常寺丞。

子庚

丑辛

孜省以江西吏。就選京師。賊事發。匿不歸。時帝好方術。孜省乃學五雷法。厚結中官梁芳。錢義。以符籙進。中旨授太常寺丞。御史楊守隨劾孜省。賊吏不宜用。帝爲改上林苑監丞。然寵幸日甚。許密封奏請。孜省因與梁芳等表裏爲奸。干亂政事。

五月。下兵部侍郎馬文升於獄。謫戍。

汪直勘事遼東還。劾文升行事乖方。逮下獄。謫戍重慶衛。并詰責諸言官容隱不劾奏。廷杖李俊等五十六人。

十六年春二月。王越襲韃靼於威寧海子。破之。

虜潛渡河入靖虜。詔以朱永爲平虜將軍。汪直監軍。越提督軍務。越說直。令永率大軍由南路。已與直將輕騎循塞垣而西。至大同。聞敵帳在威寧海子。則盡選宣大鎮兵二萬。分數道進。值風雪晦冥。掩擊破之。斬首四百餘級。獲馬駝牛羊六千。論功。封越威寧伯。

十七年夏四月。命司禮監同法司錄囚。

命太監懷恩同三法司錄囚。自是每五歲。內臣審錄以爲常。謂之大審。南京則命內守備行之。初成祖定熱審。

寅壬

之例。仁宗命閣臣會審。英宗命三法司同公侯伯朝審。至帝罷不行。而內臣大審所矜疑放遣。嘗倍於熱審。於大理寺爲三尺壇。中坐齋勅張蓋。三法司左右坐。御史郎中以下捧牘立。唯諾趨走惟謹。三法司有所出入輕重。俱視中官意。不敢忤。

秋七月。雷震郊壇承天門。○冬十月。以道士鄧常恩爲太常卿。

十八年春二月。罷西廠。

小中官阿丑。工俳優。一日於帝前爲醉者嫚罵狀。人言駕至。嫚如故。又言汪太監至。則避走。曰。今日但知汪太監也。又爲直狀。操兩鉞趨帝前。曰。吾將兵仗此兩鉞耳。問何鉞。曰。王越陳鉞也。帝听然而笑。稍稍寤。會東廠尚銘獲賊。得厚賞。直怒其不先告已。銘懼。乃廉得其所洩禁中秘語。奏之。盡發王越交通不法事。帝心始惡直。前年冬。直越在宣府。以敵退請班師。不許。陳鉞居兵部。代爲請。帝切責之。兩人始懼。至是悉召還京。營將士移直越鎮大同。寵日衰。言者交章請罷西廠。許之。尋罷陳鉞。調王越鎮延綏。降汪直南京御馬監。

夏四月。罕慎復哈密城。

罕慎寄居苦峪十年。至是率所部兵萬人。糾罕東赤斤二衛。夜襲哈密城。破之。牙蘭遁。乘勢連復八城。遂還居故土。帝喜。進罕慎左都督。

六月。韃靼寇延綏。擊敗之。

亦思馬因寇延綏。指揮劉寧敗之於塔兒山。巡撫何喬新指揮同知支玉敗之於天窰梁中。虜千戶白道山敗之於木瓜園。總兵官許寧敗之於三里塔。參將董昇等敗之於黑石崖。時寇扼於邊牆。不得出。遂大剽。

秋八月大水。

衛漳漳沱並溢。河南霪雨。自六月至於是月。渰死數萬人。

十九年夏六月。韃靼寇大同。官軍敗績。

小王子率兵三萬寇大同。連營五十里。殺掠人畜數萬。總兵許寧知敵勢盛。欲持重俟隙。乃歛兵守。而遣別將劉寧董升與周璽相犄角。寇大掠。焚代王別堡。王趣戰。使衆哭於轅門。寧憤與巡撫郭鏜等營城外。寇以十餘

人爲誘。太監蔡新部騎馳擊。寧將士爭赴之。遇伏。大敗。死者千餘人。會璽等援至。寇乃退。尋復入。寧等掩其敗。以捷聞。

王越免。

言官交劾汪直。王越交結罪。詔從未減。奪越誥券。編管安陸州。三子以功廕得官者。皆削籍。並斥右都御史戴縉爲民。韋瑛亦坐事誅。人皆快之。然直竟良死。

秋九月。召陳獻章爲翰林院檢討。尋乞歸。

獻章以舉人家。居廣東布政使彭韶總督朱英交章薦。乞以禮徵聘。吏部尚書尹旻謂獻章向聽選京師。非隱士比。安用聘。檄召至京。令就試吏部。獻章稱疾不試。乞歸奉母。乃授檢討。歸。自是屢薦不起。

旌表僧繼曉母朱氏。

繼曉以祕術。因梁芳進。封國師。日誘帝爲法事。建大永昌寺於西市。逼徙居民數百家。糜帑數十萬。其母朱氏。本娼家女也。繼曉自陳乞旌。詔不必勘覈。遽旌其門。

甲辰

二十年夏六月以思柄爲孟密宣慰使。

孟密雲南土司木邦部內地也。初木邦宣慰使罕揲法死。其孫罕落法襲職。罕揲法有女曰曩罕弄。自以分尊。不受節制。襲據公署。自稱天娘子。其子思柄。自稱宣慰使。分掠鄰境。遣使進金寶。乞別立孟密。安撫司下內閣議。萬安欲許之。劉翊劉吉曰。孟密木邦叛屬。若許之。是周天子命三晉大夫爲諸侯也。土官誰不解體。安曰。不從。則當伐之。往日麓川之敗。不可不戒。翊對曰。何以伐爲。但令守臣嚴邊備。而勅鄰境土官合兵蹙之。彼奚能爲。事遂寢。其後邊臣上言。曩罕弄將外結交趾。連兵脅諸部。萬安等請遣大臣往撫。遂命副都御史程宗往。宗受安風旨。示意曩罕弄。復遣人入貢。如前請。遂設孟密安撫司。以思柄爲宣慰使。思柄先後奪據木邦地二十七所。自是諸部擾攘侵奪。中國用兵且數十年。

旱。

京畿山東湖廣陝西河南山西俱大旱。道殣相望。

秋九月朔日食。

二十一年春正月朔星隕有聲詔羣臣言闕失。

申刻有光自中天墜。化白氣。曲折上騰。踰時復有赤星如椀。自中天西行。轟然如雷震。帝頗懼。詔羣臣陳闕失。於是吏部尚書尹旻等論傳奉官過多。吏科給事中李俊率科臣上疏曰。今之弊政最大且急者。曰近幸干紀也。大臣不職也。爵賞太濫也。工役過煩也。進獻無厭也。流亡未復也。天變之來。率由於此。夫內侍之設。國初皆有定制。今或一監而叢十餘人。一事而叅六七輩。分部藩郡。總領邊疆。援引儉邪。投獻奇巧。司錢穀則法外取財。貢方物則多方責賂。殺人者見原。債事者逃罪。如梁芳。韋興。陳喜輩。不可枚舉。惟陛下嚴加省汰。無令干紀。則近幸戢而天意可回矣。今之大臣。非夤緣內臣。則不得進。進亦不安。以財買官。以官鬻財。無怪其賂受四方。而計營三窟也。如尚書殷謙。張鵬。侍郎艾福。杜銘。南京尚書李本。侍郎劉俊。皆老而儒。尚書張鑑。大理卿田景賜。南京尚書張瑄。侍郎尹直。皆清論不愜。惟陛下大加黜罰。勿爲姑息。則大臣警而天意可回矣。爵以待有德。賞以待有功。今掾史胥徒。皆叨官祿。俳優僧道。亦玷班資。一歲而傳奉或至千人。數歲而數千人矣。數千人之祿。歲以數十萬計。是皆國之租稅。民之脂膏。不以養賢才。乃以飽姦蠹。誠可惜也。如李孜省。鄧常恩輩。尤爲誕

妄。此招天變之甚者。乞盡罷傳奉官。毋令污玷朝列。則爵賞不濫。而天意可回矣。都城佛刹。迄無寧工。京營將士。不復遺力。如國師繼曉。假術濟私。中外切齒。願陛下內惜資財。外惜人力。不急之役。姑賜停罷。則工役不煩。而天意可回矣。奸民規利。率假進奉爲名。或錄一方書。留府庫之財。爲軍國之備。則進獻息。而天意可回矣。陝西河南山西赤地千里。屍骸枕藉。流亡日多。萑苻可慮。願陛下體天心之仁愛。憫生民之困窮。追錄貴倖鹽課。暫假造寺資財。移賑饑民。俾苟存活。則流亡復。而天意可回矣。疏入。帝優詔答之。降左通政李孜省上林丞太常卿鄧常恩本寺丞繼曉革國師爲民。斥罷傳奉官五百餘人。中外大悅。時南京諸臣爭應詔。陳言給事中盧瑀御史汪奎主事張吉南京員外郎彭綱等言尤愷直。帝以方修省。不罪。然心忌之。密諭尹旻出俊瑀等。且書六十人姓名於屏。俟奏遷。則貶遠惡地。未幾。俊瑀等相繼貶斥。或以他事下吏。孜省常恩等仍復官。有寵愈甚。

三月泰山震

太監梁芳韋興糜帑藏爲奇技淫巧。結萬貴妃歡。累朝金七窖俱盡。帝一日視內藏。詰芳及興。芳曰。建顯靈宮。

及諸祠廟。爲陛下祈萬年福耳。帝曰。吾不汝瑕。後之人將汝計矣。芳大懼。遂說貴妃。勸帝廢太子而立興王。司禮太監懷恩固爭。帝不懌。斥居鳳陽。會泰山連震。占者謂應在東宮。帝心懼。寢其事。

夏四月。以康永韶爲禮部右侍郎。

永韶故爲御史。有直聲。謫知縣。中旨召還。進太常少卿。掌欽天監。時陝西大饑。永韶言。今春星變。當有大咎。賴秦民饑死。足當之。誠國家無疆福。帝悅。擢禮部右侍郎。明年。以尹旻黨。斥爲民。

秋八月朔。日食。○九月。劉珣罷。

萬安與南人相黨附。珣與尹旻王越。又與北人爲黨。互相傾軋。珣自以宮僚舊臣。遇事無所回護。刑部員外郎林俊。以劾梁芳繼曉下獄。珣於帝前解之。李孜省輩。左道亂政。欲動搖東宮。珣密疏諫。帝皆不悅。珣常斥安負國無恥。安忿。日夜思中珣。汪直寵衰。安揣知西廠可罷。邀珣同奏。珣辭不與。安遂獨奏之。陰使人許珣與直有連。帝疑未發。安又使人爲劉公子曲。增飾穢語。雜教坊院本奏之。劉公子謂珣子鎡也。帝怒。遣中官持手封書。一函詣閣。乃人許珣書。安等佯驚救。且言當令乞休。以全始終。翌日。珣乞休去。

午丙

冬十一月。召馬文升爲兵部尚書。○十二月。以彭華爲吏部左侍郎。入內閣預機務。

華。大學士時族弟也。與萬安李孜省相結。得入閣。明年。逐尹旻羅璟。人皆望而畏之。踰年。得風疾去。

二十二年。秋九月。罷南京兵部尚書王恕。出馬文升代之。

恕先後應詔陳言。凡五十餘上。皆力阻權倖。天下傾心慕之。時爲謠曰。兩京十二部。獨有一王恕。於是貴近皆側目。帝亦頗厭苦之。是年起用傳奉官。恕諫尤切。帝愈不悅。令致仕。

逮廣東布政使陳選道卒。

選。臨海人。天順中。巡按江西。盡斥貪殘吏。成化初。督學河南。汪直出巡。獨長揖不拜。久之。歷廣東左右布政。市舶中官韋眷肆橫。奏乞均徭戶六十人。選持詔書爭。帝命與其半。番禺令高瑤沒入眷通番資巨萬。選移檄獎之。且聞於朝。眷恨甚。誣奏選瑤朋比爲貪墨。遣刑部郎中李行及巡按御史徐同愛勘之。眷賄選所黜吏張襲。令誣證。襲不從。拷掠無異辭。行等畏眷。竟以誣獄上。與瑤俱被逮。士民數萬號泣遮留。使者辟除乃得出。至南

昌。疾作。行阻其醫藥。竟卒。

遣刑部侍郎何喬新聽訟播州。

播州宣慰使楊輝欲立庶子友為嗣。長官張淵阿順之。安撫宋韜等諫乃止。輝致仕。嫡子愛嗣。輝與淵謀割地授友。巡撫張瓚受輝屬為奏設安寧宣撫司。以友為之。輝死。友誣愛謀逆。聞於朝。遣喬新往勘。將行。請曰。楊氏主播州五百餘年。蠻夷服從久矣。歷代寬以文法。蓋治之以不治也。今但宜二人面質真偽。無令驚疑。喬新至。盡得其始末。白愛誣。奪友官。安置他府。斬張淵。播州遂安。

以尹直為戶部左侍郎。入內閣預機務。

直官南京八年。鬱鬱不得志。以李孜省力召為兵部侍郎。至是取中旨入閣。

二十三年春正月。皇貴妃萬氏卒。

妃服用器物窮極僭擬。四方進奉異物。皆歸之。父兄弟姪皆授都督指揮千百戶等官。中官錢能注直梁芳。韋興輩科歛民財。傾竭府庫。假以貢獻。皆由妃主之。性嫉妬。掖庭御幸有身。飲藥傷墮者無數。至是卒。帝震悼。輟

朝七日。諡曰恭肅。
端愼榮靖皇貴妃。

二月。以李孜省爲禮部右侍郎。

孜省中廢復用。益作威福。縉紳進退。多出其口。
前年冬。擢通政使。至是進禮部。掌通政如故。

秋八月。帝崩。○九月。太子祐樞卽位。○太監梁芳都督萬
喜及李孜省等有罪。減死謫戍。

言官劾孜省及其黨鄧常恩。趙玉芝。交結太監芳。外戚
喜等。諸不法事。論死。上以宅憂。謫芳南京少監。喜指揮
使。孜省。常恩。玉
芝等。戍陝西邊。

冬十月。罷傳奉官。奪僧道封號。

帝用科道言。降黜傳奉官通政任傑。侍郎薊鋼。指揮僉
事王榮等二千餘人。罷遣禪師真人等二百四十餘人。
法王佛子國師等七百八十餘
人。並追誥勅印仗。遣歸本土。

尊皇太后爲太皇太后。皇后爲皇太后。立皇后張氏。

先是孝穆太后薨。內庭籍籍指萬貴妃。帝卽位。魚臺丞徐頊疏請上母妃尊諡。遷葬。並追究薨故。廷臣議逮萬氏親。下錦衣衛鞠治。萬安懼。不知所出。曰。我久與萬家不往來。劉吉亦有連。自危。與尹直共擬旨寢之。帝仁厚。恐傷先帝意。不問。安吉得無事。帝生西宮時。吳后往來保抱謹。帝命尚膳如太后禮。

萬安罷。

帝於宮中得疏一小篋。皆論房中術。末署曰臣安進。帝令太監懷恩持至閣。曰。此大臣所爲耶。安愧汗伏地。不能出聲。庶吉士鄒智。御史姜洪。文貴。交章列安罪狀。復令恩就安讀之。安數跪起求哀。無去志。恩直前摘其牙牌。曰。可去矣。始惶遽歸第。乞休去。安時年七十餘。在道猶望三台星。冀復用。

追諡母紀氏爲孝穆皇太后。○以禮部侍郎徐溥入內閣預機務。

尋進禮部尚書兼文淵閣大學士。

十一月。召王恕爲吏部尚書。以馬文升爲左都御史。

時恕致仕家居。言官論安者輒薦恕。司禮監懷恩亦素重之。力勸帝。故卽家起用之。

尹直罷。以劉健爲禮部侍郎。入內閣預機務。○逮梁芳李孜省等下獄。十二月。孜省死於獄。

芳等旣謫戍。遇赦當還。印綬監太監蔣琮言。芳等罪大不當赦。復逮下獄。孜省不勝撈掠死。常恩。玉芝。尋復遇赦。仍徙邊。芳廢死。

葬茂陵。

御撰資治通鑑綱目三編卷九

御撰資治通鑑綱目三編卷十

起戊申明孝宗弘治元年盡乙丑明孝宗弘治十八年凡十八年

申戊

孝宗敬皇帝弘治元年春正月以何喬新爲刑部尚書。

喬新以剛正爲萬安劉吉所忌。帝嗣位。由刑部侍郎晉南京刑部尚書。借升秩以遠之。中官懷恩詣閣正色曰。新君宜用正人。胡爲出何公。安等默然。杜銘罷。羣望屬喬新。時吉代安爲首輔。終忌之。久不補。帝以王恕薦。召用之。

二月帝耕藉田。

禮畢。宴羣臣。教坊以雜伎進。馬文升厲色曰。新天子當知稼穡艱難。豈宜以此瀆亂宸聰。卽斥去之。嗣後每歲仲春舉行。

罷選淑女。

中官郭鏞請豫選妃嬪。以廣儲嗣。庶子謝遷上言。山陵之工未畢。諒闇之痛猶新。此必宦豎巧爲諛詞。以動陛

下。非本心也。陛下富於春秋。俟祥禪之後。徐議未晚。願亟寢前命。庶不遠而復從之。

封哈密衛左都督罕慎為忠順王。○三月。帝視國子監。○

御經筵。命儒臣日講。○起用言事降謫諸臣。

主事張吉。王純。中書舍人丁機。進士李文祥。教毓元。並以言事遠謫。南京吏部主事儲燿。上言。五人者。既以直言。狗國。必不變節辱身。乞擢置風紀。論思之地。則言論風采。必有可觀。帝命吏部起用之。

夏四月。釐正祀典。

依洪武舊制。凡祀典所無者。悉罷之。

冬十月。妖僧繼曉伏誅。

法司擬曉罪。以犯在赦前。免死。科臣陳璘等。劾曉罪大惡極。不當宥。命棄市。

土魯番殺忠順王罕慎。復據哈密。

二年。春二月。下監察御史湯鼐於獄。戍之。

先是帝廣開言路。庶吉士鄒智進士李文祥交章論劾常路。鼎意氣尤銳。大臣多畏惡之。劉吉尤刺骨。使人唱御史魏璋曰。君能去鼎。行僉院事矣。璋欣然。日夜伺鼎短。鼎家壽州。知州劉槃嘗餽鼎白金。遺之書云。夢一人騎牛幾墮。君手挽之。引就道。因解之曰。人騎牛。國姓意者。國將傾。君扶之。引君當道也。鼎喜。以書示客。璋得間會帝遣官賑四川。中書舍人吉人薦鼎及劉槃。可任。璋因嗾同官陳景隆劾吉人。私立朋黨。并及槃。貽書狀。劉吉從中主之。下詔獄。鼎槃戍邊。人削籍。智文祥貶官。璋遂擢大理丞。

以馬文升爲兵部尙書兼提督團營

承平久。兵政廢弛。西北部落不時窺塞下。文升嚴覈諸將。黜貪懦三十餘人。奸人大怨。夜持弓矢伺其門。作謗書射入東長安門內。帝聞。詔錦衣衛緝捕。給騎士十二人。衛出入。文升乞休。慰諭之。

夏五月。河決開封。入沁河。○秋七月。詔求直言。○冬十二月朔。日食。○賜故少保于謙諡忠愍。

加贈特進光祿大夫上柱國。諡忠愍。立祠墓所。賜額曰旌功。

戊庚

三年春三月令天下設預備倉。

每十里積粟萬石。及數爲稱職。過者旌擢。不及者罰之。府州縣及軍衛官視此升黜。

冬十一月有星孛於天津。詔羣臣言闕失。

大學士劉吉等言。妖星見天津。歷人星杵曰。近營室。考之載籍。爲兵爲饑。爲水旱死亡之徵。又曰。天下大亂。竊見連年風雨不時。所在水旱。邊境未寧。盜賊竊發。禍亂之作。恐亦不難。惟陛下深思軍民困苦。沙河橋南海子。役軍士數千。經年未見畢工。內府磁器本足用。無故遣內官燒造。並宜停止。所司有陳闕失者。伏望聽納。次第舉行。則可以易災爲祥。轉禍爲福。從之。

京師地震。

四年春二月逐番僧。○三月逮兩廣總督秦紘。尋免歸。

初紘蒞鎮。劾總兵官柳景貪暴不法。景逮下獄。以連姻周太后家有奧援。反訐紘不已。命逮紘并鞫。罷歸。紘被逮時。方議討後山賊。治軍事畢。從容就道。儀衛騶從不貶損。旣踰嶺。囚服就繫。謂官校曰。兩廣蠻夷雜處。總制

尊。遽就拘執。恐損國威。既踰嶺。真囚矣。人服其得體。

夏六月。地復震。○秋八月。罷刑部尚書何喬新。

喬新執法不阿。每重王恕。輕劉吉。吉御之。嗾御史鄒魯。劾喬新通賂。鞫治無實。遂乞休去。

九月。以彭韶爲刑部尚書。○冬十月。以禮部尚書邱濬兼

文淵閣大學士。

尚書入閣自濬始。至六年二月內宴。濬遂居吏部尚書王恕之上。其後由侍郎詹事入者。班皆列六部上矣。

十二月。土魯番以哈密來歸。○鳳陽陵火。

延九十餘里。

召秦紘爲南京戶部尚書。

言官論紘無罪。詔起之。

戶部奏是歲天下戶口之數。

子壬

御批通鑑綱目三編卷一

戶。九百一十一萬三千四百四十六口。五千三百二十八萬一千一百五十八。

五年春二月。減陝西織造絨氍之半。

巡按御史張文言。陝西歲歉之後。民病未甦。司禮監近下帖子。降圖式。織造數百事。並宜停止。以其價振業貧民。命減所織之半。

三月。立子厚照爲皇太子。○夏五月。求遺書。○六月。下御史彭程於獄。尋遣戍。

程巡視光祿寺。見造皇壇祭器。皇壇者。憲宗修齋行法之所也。程疏言。光祿金錢。皆民膏血。用之得當。猶恐病民。况投無益之地。先帝篤信李孜省。繼曉輩。意在求福。今二人已伏辜。不能自保。焉能福人。陛下如有此舉。宜遏之將萌。如無此舉。論臣下逢迎之罪。帝詰責光祿卿。停俸。程暴揚先帝下獄戍邊。

秋八月。劉吉罷。

吉與萬安。劉瑯。在憲宗朝。無所救正。時有紙糊三閣老。泥塑六尙書之謠。帝仁明。同列劉健。徐溥。皆正人。二人

有論建。吉亦署名。時時竊美名以自蓋。至是帝欲封后弟伯爵。命吉撰誥券。吉言必盡封兩太后家子弟。乃可。帝不悅。遣中官諷令移疾歸。

冬十月更中鹽法。

明初於各邊開中。令商人募民墾種。築臺堡。自相保聚。邊儲以充。成化時始以銀易米。然未嘗著爲令也。至是戶部尚書葉淇。召商納銀。令運司類解太倉。分給諸邊。每引輸銀三四錢有差。視國初直加倍。而商無守支之苦。一時太倉銀累至數百萬。然赴邊開中之法廢。商屯撤業。菽粟翔貴。邊儲日虛矣。

十一月停納粟例。

尚書王恕言。永樂宣德正統間。天下亦有災傷。各邊亦有軍餉。當時無納粟例。糧不聞不足。軍民不聞困弊。比年來一遇災歉。輒行捐例。人旣以財進身。欲其砥廉隅。爲循吏。豈可得也。帝卽命止之。

六年春二月錄常遇春李文忠鄧愈湯和裔世襲指揮使。

遇春元孫復。文忠元孫璿。愈五世孫炳。和六世孫紹宗。皆與軍民雜處無職。命世襲指揮使。以奉先祀。

河決張秋。以劉大夏爲副都御史治之。

詔博選才臣往治。時大夏爲浙江左布政。以王恕等薦擢副都御史。賜勅遣之。大夏塞張秋鎮河下流。使北入東昌臨清。由天津入海。運道以通。復自黃陵岡。浚賈魯河。孫家渡。四府營。上流。以分水勢。築長堤。起胙城。歷東明長垣。抵徐州。亘三百六十里。水大治。更名張秋鎮曰安平鎮。

夏四月。土魯番復據哈密。

初土魯番以哈密來歸。詔封元裔陝巴爲忠順王。欲以鎮定諸番。未幾。諸番索陝巴財幣不得。阿黑麻怒。率兵夜襲哈密。執陝巴去。事聞。命兵部侍郎張海。前都督同知緱謙往經略。

閏五月。免應天蘓松田租。

以水災蠲租一百八十餘萬石。

吏部尚書王恕罷。

先是恕與邱濬同階太子太保。恕長六卿。位濬上。及濬人閣。恕以吏部弗讓也。濬不悅。恕里居日。嘗屬人作傳。

寅甲

梓行。濬謂其沽直謗君。太醫院判劉文泰與濬素往來。亦銜恕。因訐恕變亂選法。所作傳侵先帝。無人臣禮。欲中以奇禍。外論謂濬實嗾之。恕奏辨。下文泰獄。訊狀。果連濬。濬亦疏辨。乞放歸。帝慰留。恕稱疾罷歸。文泰貶官。

六月蝗。○秋八月。京師大雨雹。○刑部尙書彭韶罷。

韶昌言正色。與王恕何喬新稱三老。然每爲貴戚近臣所疾。故致仕去。

七年。春二月。詔羣臣言闕失。○三月。巡撫貴州都御史鄧廷讚平黑苗。

都勻苗也。富架長脚等作亂。廷讚與兵備副使吳倬遣熟苗詐降富架。誘入寇。伏兵擒之。乘勝深入。連破百餘寨。生擒長脚以歸。廷讚請於都勻清平二衛設流官。與土官兼治。於是設府一。曰都勻。州二。曰獨山。麻哈。縣一。曰清平。苗患漸息。

命兩畿捕蝗。

民捕蝗一斗。給米倍之。

秋七月。京師地震。○命工部侍郎徐貫。經理蘇杭水利。

貫上言。東南財賦所出。而水患為多。永樂初。命夏原吉濬治。時以吳淞江灩沙浮蕩。未克施工。逮今九十餘年。港浦愈塞。臣相度地勢。疏吳江長橋。導太湖。散入澱山陽城。昆承等湖。又開大石。趙屯等浦。洩澱山湖水。由吳淞江入海。開白魚洪。鮎魚口等處。洩昆承湖水。由白茆港入海。開斜堰。七浦。鹽鐵等塘。洩陽城湖水。由七丫港入海。下流既通。於是開湖州之淞涇。洩天目。安吉諸山水。自西南入太湖。開常州之百瀆。洩溧陽。鎮江。練湖之水。自西北入太湖。又開諸斗門。以洩運河之水。由江陰入大江。上流亦通。凡修濬河涇。港瀆湖塘斗門堤岸。百三十有五所。役夫二十餘萬。東南水患少衰。

八月。以李東陽為禮部侍郎。兼翰林學士。典誥勅。

大學士徐溥等。以誥勅繁。請如先朝王直故事。設官專領。乃擢東陽入閣典之。

九月。南京地震。

八年。春二月朔。日食。○武英殿大學士邱濬卒。○以禮部

辰丙

侍郎李東陽。少詹事謝遷。入內閣。預機務。○秋七月。以宋儒楊時從祀孔廟。○冬十二月。復哈密。

土魯番既襲據哈密。僭稱可汗。侵沙州。迫罕東諸部附已。馬文升言。此寇桀驁。不大創。終不知畏。宜用漢陳湯故事。襲斬之。以指揮楊翥。熟番情。召詢方畧。翥備陳哈密可取狀。文升請於帝。勅發罕東赤斤苦峪兵。令副將彭清將之。隸巡撫許進往討。分數道進。至羽集。七川畢會。夜半大雨雪。及明。奄至城下。拔之。牙蘭遁。後二年。土魯番以陝巴來歸。仍令爲忠順王。鎮哈密。

九年夏四月。以周經爲戶部尙書。

時帝寬仁。而戶部尤奸蠹所萃。經悉按祖宗成憲。無所顧。緩逋征。裁冗濫。四方告災。必覆請蠲除。監稅官課入多者。與下考。冒濫苛切之風少衰。

下給事中龐泮御史劉紳等於獄。

岷王奏武岡知州劉遜不法事。命錦衣官校逮之。泮等率科道論救。帝以親王劾一州官。輒交章奏阻。下泮紳

等六十二人於獄。臺諫署一空。命尙寶司及中書代收部院封事。九卿力諫。釋之。遜亦無事。

六月。詔舉將才。○冬十二月。刑部吏徐珪。請革東廠。黜爲民。

刑部郎中丁哲。負外郎王爵。斷獄忤東廠。法司承太監楊鵬指。擬哲等罪。珪不平。上言。臣在刑部三年。見盜賊多東廠鎮撫司所獲。有稱校尉挾仇陷。或爲人報仇。或受首惡贓。令傍人抵罪。刑官莫敢改。多枉殺人。臣願陛下革東廠。戮楊鵬。臣一介微軀。自知不免。與其死虎口。孰若死於朝廷。願陛下斬臣首。行臣言。死不悔。帝以其狂誕。發原籍爲民。哲等放歸。進士孫磐上疏曰。近者言官劾人。率乘勢敗。排觸奸倖。反出胥吏。議者羞之。請定建言爲四等。最上彈劾權貴。其次補拾闕遺。又其次建白裨國家大體。分別擢敘。粉飾文具。循默不言者。黜之。時不能用。

十年春三月。召大臣議政文華殿。

帝御經筵畢。召徐溥等於文華殿。出各司題奏。面裁決。溥等擬旨上。帝應手改定。無疑滯。每顧問。必稱先生。帝

卽位以來。宣召顧問。自此始。後以爲常。

夏五月。小王子寇潮河川。指揮劉振等戰死。○六月。命戶部侍郎劉大夏督理宣大軍餉。

大夏將行。尙書周經謂曰。塞上勢家子。以市糴爲私利。公母以剛賈禍。大夏曰。處天下事。以理不以勢。俟至彼圖之。初。塞上糴買。必粟千石。芻萬束。乃得告。以故中官武臣。得操利權。大夏令有芻粟者。自百束十石以上。皆許。勢家無所牟利。不兩月。儲積充羨。

冬十月。起王越總制三邊軍務。

帝元年。小王子奉書求貢。自稱大元大可汗。朝廷方務優容。許之。自是與伯顏猛可。及北部亦卜剌因王。火篩等。往來套中。出沒爲寇。諸虜相倚日強。遼東宣大。延綏俱被殘。詔起越原官總制甘涼軍務。越言甘涼兵弱。非藉延寧兵。難以克敵。請兼制兩鎮。從之。

簡閱禁兵。

午戊

馬文升疏言。歷代兵制。不使權歸一人。漢制有南北軍。南軍守王宮。主禁衛。北軍護京師。聽征討。各有所掌。而南軍尤托以腹心。我太祖法古。置十六衛親軍指揮使司。不隸五府。爲禁兵。卽古之南軍也。其他衛屬五府。卽古之北軍也。永樂中。增設十二衛。又選精壯數千人。屬御馬監。更番上直。近年禁兵廢弛。請勅大臣。揀選操練。令更番直各門。官爲鈐束出入。從之。

十一年春三月。皇太子出閣講讀。

東宮宦豎。不欲太子近儒臣。數以事間講讀。詹事吳寬上疏曰。東宮講學。寒暑風雨則止。朔望令節則止。一年不過數月。一月不過數日。一日不過數刻。進講之時。少輟講之日多。豈容復以他事妨之。古人八歲就傅。卽居宿於外。欲令離近習。親正人。庶民且然。況太子天下本哉。帝嘉納之。

秋七月。王越襲小王子於賀蘭山。破之。

虜巢山後久。熟知路徑。累招野也克力等擾邊。越分兵三路進。俱有斬獲。日晡收兵回。別伏道傍。賊來襲。復追殺至柳溝。獲駝馬牛羊器仗千數。論功進越少保。遂條上制置哈密事宜。會李廣得罪死。言官連章劾廣黨。皆

及越。越聞。
憂患卒。

九月。華蓋殿大學士徐溥罷。

溥性凝重。有度。在政府十二年。屢遇大獄。及逮繫言官。委曲調劑。帝多嘉納。嘗言祖宗法度。所以惠元元者。備矣。患不能守耳。卒無所更置。至是以疾乞歸。踰年卒。贈太師。諡文靖。

冬十月。清寧宮災。

太皇太后宮也。先是有熊踰西直門。兵部請嚴武備。郎中何孟春日。宜慎火。已而禮部。內府。軍器庫。香經廠。內官監。連年災。

太監李廣有罪自殺。

廣以符籙禱祀。獲寵任。權傾中外。勸帝建毓秀亭於萬歲山。亭成。幼公主殤。宮復災。日者謂建亭犯歲忌。太皇太后患甚。廣懼。飲藥死。帝疑廣有異書。使使即其家索之。得賄簿。多文武大臣名。餽黃白米各百千石。帝曰。廣食幾何。乃受米如許。左右曰。隱語耳。黃者金。白者銀也。帝怒。下法司按問。諸臣皆懼。昏夜赴壽寧侯張鶴齡求

解時方以宮災求直言。編修羅玘上言曰。今日之事。如癰瘡。割之去易而身危。消之去遲而身安。竊見文武官賄廣求進。廉耻掃地。其間有部寺之尊。將帥之寄。天下四夷。方以爲丙魏姚宋。方召衛霍。今一旦暴白。恐生慢易。雖實有丙魏方召之徒。亦不復信。此大可憂也。如遂已之。廉恥愈衰。乞密諭賄廣者引退。或以他事黜之。庶可消已成之黨。絕未起之禍。章下所司。

十一月朔日食。

十二年夏四月更定律例。

給事中楊廉上言。高皇帝肇造之初。特命劉基陶安等詳定律令。且諭之曰。立法貴簡。若條緒繁多。可輕可重。吏得夤緣爲奸。聖祖重律輕例之意見矣。百三十年來。律行既久。條例漸多。近令法司詳議。革其繁瑣。臣以爲非深於經者。不足以議律。非深於律者。不足以議例。望特選素有經術。深明律意者。專理其事。以太祖立法貴簡之心爲主。一切近代冗雜。悉爲革去。俾以例通律之窮。不以例淆律之正。庶刑官有所遵守。帝嘉納之。

火篩寇大同。遊擊將軍王果禦之。敗績。

申庚

虜騎七千餘。入威遠衛。杲與都指揮鄧洪等禦之。戰數合。大敗。洪及官軍九百餘人皆死。命平江伯陳銳爲靖虜將軍。充總兵官。侍郎許進提督軍務。

前禮部主事楊循吉請復建文位號。不從。

循吉言。建文君乃高皇帝嫡孫。躬受神器。其後太宗入繼大統。削建文位號。百餘年來。未蒙顯復。夫建文雖以左右非人。得罪社稷。而實則生民之主也。請復尊號。如景皇帝故事。庶幾禪益先聖。有光大孝。下禮部議。格不行。

十三年夏五月朔。日食。○六月。火篩寇大同。遣朱暉。史琳帥師禦之。

言官劾陳銳等無功。乃召還。以保國公朱暉充總兵官。侍郎史琳提督軍務。益兵往禦。

秋七月。京師地震。○九月。下行人司行人王雄於獄。貶其官。

西辛

雄上言。克敵在將得其人。選任不可不慎。比者胡虜入寇。廷臣首推陳銳。以國之死生。衆之存亡。試之謀勇。未聞之人。虜益猖獗。今斥陳銳。用朱暉。暉素不更事。固不多於銳也。願陛下罷暉。責前日推舉銳之罪。然後從公拔其尤者。俾專閫外。勿署監軍提督以撓之。今之監督。卽唐觀軍容使。與監軍之任也。以郭子儀。李光弼之勇略。然魚朝恩爲觀軍容使。而九節度皆潰相州。況其下乎。帝以雄妄言。下獄。謫縣丞。比暉至。寇已退。乃還。

十四年春正月朔。陝西。河南。山西地震。

朝邑震十七日。壞廬舍。壓死人畜無算。

夏四月。火篩及小王子連兵入寇。復命朱暉帥師禦之。

虜以八千騎。東駐遼塞下。入長勝堡。殺掠殆盡。自鹽池驛至花馬池等處。虜衆充斥。道路不通。是年秋。暉等以五路之師。夜襲虜於河套。斬三級。以捷聞。小王子火篩。以十萬騎分道入。散掠固原。寧夏境。三輔震動。

秋七月。普安苗婦米魯作亂。命南京戶部尙書王軾督師討之。

初普安土官隆暢既老。子禮聽營長阿保讒構。相仇怨。暢有妾曰米魯。以罪見逐。依子禮同居。禮阿保皆與亂。暢聞誅子禮。阿保懼禍。助米魯率衆攻暢。破百餘寨。暢逃雲南。鎮巡官召阿保與暢盟。息兵。米魯潛令人殺暢。與阿保等亂益甚。鎮巡官發兵捕斬阿保。米魯亡入霑益州。至是復歸故營。攻劫諸寨。鎮守太監楊友等討之。大敗。賊乘勝劫畧。普安幾陷。命軾兼左副都御史。提督軍務。軾未至。米魯擁萬騎劫營。擄友去。

九月朔日食。○召秦紘總制三邊軍務。

言官劾史琳等喪師溺職。召琳還。起秦紘戶部尙書。兼副都御史。代之。紘至。錄死事者功。劾敗將楊琳等四人罪。練壯士。興屯田。申明號令。軍聲大振。

冬十月。以馬文升爲吏部尙書。劉大夏爲兵部尙書。

大夏辭不許。旣拜命。問曰。卿數引疾。何也。大夏頓首言。臣老且病。竊見天下民窮財盡。脫有不虞。責在兵部。度力不辦。故辭耳。帝默然。

十二月。火篩等出河套。詔朱暉還。

戊壬

御批通鑑輯覽卷一百一十一

留精兵三千防禦。以叅將楊玉領之。明年正月。朱暉引兵還。都給事中屈伸疏劾暉等西討無功。班師命甫下。將士已入國門。不知奉何詔旨。且此一役。糜京帑及邊儲。共一百六十餘萬。而首功止三級。是以五十萬金易一無名之首也。所有有功將士。至萬餘人。假使餞一渠魁如火篩。或斬級至千百。將竭天下財。不足供費。而報功又不知幾萬萬也。暉等宜論罪。置重典。不聽。

十五年秋七月。王軾破米魯。斬之。

軾調官土兵。分道進擊。連破賊。賊遁走。僉事王懋中。土知府鳳英。追及之。馬尾籠。官軍四面急攻。米魯突圍出戰。英臨陣格殺之。餘黨平。

九月朔。日食。○冬十一月。瓊州黎亂。討平之。

前知府張桓貪殘私歛。繼以余濬。賊虐尤甚。黎人苦之。符南蛇等遂聚衆爲亂。鎮兵討之不下。戶部主事馮顯上言。瓊州在大海中。週三千里。其五指山。林箐深密。川澤險阻。兵不可入。黎衆聚散無常。攻之則巢穴難窮。置之則侵掠不已。乞勾考熟知夷情者。令各集土兵。聽巡守官節制。有能擒斬首惡者。復其祖職。此以夷攻夷。數

月間當見俘獲。不然。師旅之興。無時已也。帝從之。明年七月。斬符南蛇。賊遂平。

十六年夏四月。遣南京刑部侍郎樊瑩巡視雲貴。

先是雲南景東衛大疫。雲霧黑暗。凡七日。不辨晝夜。龍川宣慰司雨雪如手掌。盡殺禾稼。宜良地屢震。暴風曲靖火災。燬房舍無算。帝以雲南災變非常。皆由官不得人。上下攫取。以致小民含怨。上干天和。命瑩兼左僉都御史巡視。瑩至鎮。黜不職者數十人。民心漸安。

秋九月。桃李華。

十七年春二月。詔每歲審錄重囚。母限一日。

故事。每年會官錄囚。率以一日告竣。兵科給事中潘釋言審錄數多。一日不能詳定。恐致冤濫。太宗皇帝時。刑部上大辟三百餘人。諭各官再訊。遲十日不爲害。祖宗好生之仁。萬世所當遵也。從之。

三月。太皇太后周氏崩。定祔廟制。

先是慈懿錢太后崩。周太后不欲慈懿合葬裕陵。廷臣伏哭文華門。始得請。及葬。異隧。距英宗元堂數丈許。室

之。虛右壙以待。隧獨通。至是太后崩。帝御便殿。出裕陵圖示大學士曰。陵有二隧。一室一通。此皆先朝內臣所爲。未合禮。昨見成化時彭時商輅等章奏。先朝大臣忠厚爲國如此。先帝亦甚不得已耳。後問耐廟禮。劉健言。當時定議。慈懿太皇太后居左。今大行太皇太后居右。用唐宋故事。非漢以前制。帝曰。事須師古。末世不足效祖宗來。惟一帝一后。今若並祔。是壞禮自朕始也。乃援孝穆別祭奉慈殿爲言。下廷臣議。英國公張懋等言。春秋考仲子之宮。胡安國傳云。孟子入惠公之廟。仲子無祭所。以此觀之。祖廟無二配。而周禮有祀先妣之文。疏云。姜嫄也。唐宋推尊太后不配食者。立別廟享之。亦得闕宮之義。宜倣故事。於奉先殿外建廟奉祀爲宜。帝然之。將建廟。欽天監奏年月不宜。廷議請暫祀太皇太后於奉慈殿正中。徙孝穆居左。終明世皆用其制。

夏四月。葬孝肅皇后於裕陵。○五月。罷中官監織造。

命鎮巡官領之。
從劉大夏請也。

六月。雨雪。○命兩京五品以下官。六年一考察。四品以上自陳。著爲令。

故事。方面官三年朝覲。一考察。兩京堂上官不與。至五品以下。十年始一行。居官率九載。年勞轉遷。或服除改補。多不及期。給事中許天錫。請京官六年一考察。大僚令自陳。簡去之。命從所請。

火篩入大同。指揮鄭瑀戰死。○廬山鳴。

聲如雷。次日大風雨。平地水丈餘。溺死星子德安二縣人無算。

秋八月。置東西衛軍。

帝欲宿兵近地。為左右輔。劉大夏言。保定設都司。統五衛。祖宗意當亦如此。請遣還操軍萬人。為西衛。納京東兵密雲薊州。為東衛。報可。中官監京營者。悉失兵。揭飛語宮門。帝以示大夏曰。宮門豈外人能至。必此曹不利失兵耳。由是間不行。

九月。復置起居注。

洪武間。設起居注。後廢。至是太僕少卿儲燾言。古者立史官。記言記動。典至重也。臣見陛下宣召羣臣。多係帷幄造膝之言。近臣不得以聞。史官莫由紀錄。失今不圖。恐歲月綿遠。傳聞各異。事跡無以究其始末。乞勅廷臣

曾蒙召問者。備錄呈覽。宣付史館。庶幾聖君言動。舉無所遺。羣臣論說。亦以附見。報可。

冬十一月。貶大理少卿吳一貫爲嵩明州同知。

先是。秦寧衛部落射傷海西貢使。指揮張天祥出毛喇關。掩殺他衛三十八人。指爲射貢使者。巡撫張鼐以捷聞。會指揮張茂與天祥有卻。發其事。命一貫往勘得實。論天祥死。斃獄中。天祥叔父洪。屢訟冤。帝密令東廠廉其事。還奏所勘皆誣。因逮一貫。帝御午門親鞫之。盡反前獄。抵一貫死。閔珪進曰。一貫推案不實。罪當徒。帝不允。珪執如初。帝怒。令更擬。珪終以原擬上。謫一貫嵩明州同知。茂擬死。洪反得論功。帝晚年委任大臣。中官勢稍絀。惟天祥事發自東廠。廷議猶爲所撓焉。

罷雲南銀場。

十八年春正月。小王子入寇。○二月。御經筵。

學士張元禎。請講太極圖西銘等書。亟索觀之。喜曰。天生斯人。以開朕也。元禎清癯。長不踰中人。先是。充日講。帝特設低几聽之。

夏五月。帝崩。

帝大漸。召劉健李東陽謝遷至乾清宮。執健手曰。先生輩輔導辛苦。朕脩知之。東宮年幼。好逸樂。先生輩當教之讀書。輔導成德。健等獻欬受命。辛卯。召東宮諭以法祖用賢。午刻崩。年三十六。

太子厚照卽位。○秋八月。尊皇太后爲太皇太后。皇后爲皇太后。○冬十月。葬泰陵。

冬十一月。詔大理少卿吳一貫為密明州同知。

星太司。於十月。義泰刻。

太子。皇太司為太皇太司。皇司為

太子。皇太司為太皇太司。皇司為

御撰資治通鑑綱目三編卷十



